

অক্ষকান

মাহেকীয়া সাহিত্য সংকলন
বিশ্বপ্রিয়া মণিপুরী

২য় বছর ২য় সংখ্যা



শুভ উদ্বোধন

১ মাঘ, ১৪১১ সন

সম্পাদক

শ্রীশ্রী কুমার মৈত্রেয়

ভাঃ বনসেবা (অবঃ প্রাপ্ত)

APARUPA

A monthly, Sahitya Sankalan, Published in Bishnupriya Manipuri Language, Printed at Angelica Imprint, Gancshguri, Guwahati - 781 005

Editor - Compiler

M. K. Sinha, IFS (Retd.)

Publisher

Shankar Sinha
Rajgarh Road
Guwahati - 7

Cover Designed by

Net Education Brotherhood
Rajgarh Road, Guwahati -7

Copy Right

M.K. Sinha, IFS (Retd.)
Guwahati -7

Price

Rs. 25.00 only

প্রভুর নিঙে

নমিতা সিংহ (নুন)
গৌহাটী

ইমারাতত্ব হুনেছু প্রভু, তি দয়ার সাগর
লাগের উতা দেনার পিছে, তি আর নাদর।
বাপক মালক জিয়া জিপুত, জগৎ হানেই তি,
যদি থার কোন অপরাধ, ক্ষমা চাউরী মি।
আঁধার পহর, হারৌ যারৌ, হাবি তরেই দান,
বিপদ আপদ লিত পারলে নার অভিমান।
জীরন পথর কৈনা কৈঠেকে থাইয়া লগে লগে
জট লাগলে কামে কাজে নিছগা বাগে বাগে।।

রাধা বিনোদিনী

मनीन्द्र कुमार

যানা দিবে নাই	পথে উবা নাই
ডিলে লু ঘরে যানা।	
ঘরেদে মাততাই	‘লাজ লজ্জা নাই’
কিহান্তে ঐতৈ কানা।।	
বিয়ানে উঠিয়া	হাবিরে ডাহিয়া
মাততাই কলকিনী।	
কুলে কালি দিয়া	জাতকুল গিয়া
অয়তউ অভাগিনী।।	
পীরিতি আবিরে	ছুপা দিলে মোরে
ঘরেন্ত ঐতৌ বেঘর।	
কলিকিনী করে	মোরে জুড়ে জুড়ে
কিহান নুঙেই তোর।।	
কালিন্দীত পেয়া	গারীগ বুজিয়া
কালি দিয়া তোর।	
রসিয়া রসিয়া	মানুরে ডাহিয়া
মাতর ঐল কালাজ্বর।।	
নয়ানে ধরিয়া	পরাণে বধিয়া
কিসাদে পীরিতি তোর।	
অন্তরউ কালা	বাহিরউ কালা
চরিতউ কালা তোর।।	
মোরে খুটা দিয়া	আবেরা মালয়া
তেরাদে মুচ্ছি দ্যর।	
চামহান চিড়িয়া	নুনর ছিটা দিয়া
হারৌ ঐয়া নাছর।।	
প্রেমর মুরতি	অগতির গতি
মানরাং জারি পিটর।	

মোর বেলিতি	নিদয় নিয়তি
নিঠুবা মূর্তি ধরর।।	
যমুনার জলে	মিলা দিলে ছলে
অনল গরল পানী।	
অনল কবলে	গরল ছোবলে
ঐলু মি পাগলিনী।।	
পাগলিনী বেশে	নাচে দেশে দেশে
লইলু নাঙ নটিনী।	
তোর প্রেম রসে	বুড়িয়াউ শেষে
নাইলু অনা ঘরণী।।	
এবাকা মাতর	তুমি মহাচোর
হুদিগো নিলাগা মোর।	
অন্তরে হমেয়া	বিবশ করিয়া
নাঙ দিলা মি নাগর।।	
চান্দ মুখদিয়া	অবশ করিয়া
ত্রিভঙ্গ কইলা মোরে।	
নয়ন বাধিয়া	অঞ্চলে ঢাকিয়া
বাশীগ নিলাগা চোরে।।	
কার ঘরে নিয়া	চরেদে বহিয়া
গছলা মোরে সিন্দুর।	
নয়নর কালি	বয়ানেতে ঢালি
বানেইলা চিত চোর।।	
চন্দ্রাবলী কুঞ্জে	রাতিহান ভুঞ্জে
আইলে বিয়ান পরে।	
ঠাচানেই তোরে	মাত্তেই মোরে
আছিলু চরণে পড়ে।।	
চাতুরী জানিয়া	গারী ছাংকরিয়া
বৃন্দাবনে কালা ঐলে।	
মোরে বেছে দিয়া নবদ্বীপে গিয়া	
গারীগ আন্দুকা কৈলে।।	
কালার পীরিতি	নেই মতিগতি
পীরিতি পীরিতি সার।	
পীরিতি সাগরে	ঝাপ দিলে তোরে
কালায় করতৈ পার।।	
নারীর্ ধরম	মান সন্ত্রম
পীরিতি সাগরে হানি।'	
জ্ঞাতিকুল ধন	মনর ভরম
দিয়া ঐল বিনোদিনী	

(কবিতাহান মহাসভার সাহিত্য চক্র'ত পাঠ করেছিলুহান। শ্রীমতি কুম কুম সিংহ গিথানকে কবিতাহানর শিরোনামাহান দিয়া দেছিলী।)

ধন চিনো

ফাল্গুনী সিংহ

মূৰ্খ শৌল হিনপেইতারা, মালক বাপক,
 'মূৰ্খ পুত্র যম সম' সংসার নরক।
 জিপুত বিদ্যান এলে, মেইখঙ ঙালর
 বিদ্যাহীন পুত্র-কন্যার, দিনে রাতি অর।
 কনাক এহান লৈরিকেদে, মনযোগ দেই
 হেলা কৈলে জনমহান, মাঙেতৈ শ্বেনেই।
 বিদ্যাসম গুণনেই, সংসার ভিতরে,
 বিদ্যার কদর চেই, ত্রিভুবন জুড়ে।
 রাজায় পূজা পার, তার রাজ্য জুড়ে,
 হাবিদেহে মান্য অর, বিদ্যা থাইলে পরে।
 পণ্ডিতর সভারমা, মূৰ্খশোভে নারের,
 হংস মধ্যে বক যথা, মূৰ্খ তিল নারের।
 লেখাপড়া শিক্ষা নাইলে, জীবন-যৌবন,
 দুষ্ট কর্মে মত্ত ঐয়া, অকাল মরণ।
 কর্মযুদ্ধে পরাভব, দুঃখ সুনিশ্চিত,
 নরমধ্যে মান্য নার, ঘৃণিত পতিত।
 অবিদ্যায় জীবন শূণ্য, বন্ধু নাপার দেশে,
 বিদ্যাহীনে সর্বশূণ্য, দারিদ্র দোষে।
 যোগেরতা শৌনেই, ঘরগ শূণ্য তার,
 মূৰ্খ শৌয়ে জিঙে ঘরগ, করের অন্ধকার।
 'বরমেকো গুণীপুত্র, ন চ মূৰ্খ শতৈরপি,
 একচ্ছন্দ্র স্তমোহন্তি, ন চ তারা গণৈরপি।'
 শৌ আগ, এলেউ হবা, যদি বিদ্যা থার,
 একা চন্দ্র ঙালকরের, জগৎ সংসার।
 শতপুত্র ঐয়াউ যদি, মূৰ্খ ঐয়া থার,
 কোরাং মিঙাল পেইতেই, আধারে আধার
 দিন আহান আয়ুঞ্চাল, থামপাল এগর,
 হাজারে বিজারে ফুল, তিরা গাছ জারর।
 এলেউ হরকাং জারি, থামপালর আদর,
 হাবিহানে আতে করে, করতারা কদর।
 মহীবৃক্ষ তিরা জারি, ফুল অপার
 মাটিত পড়তেই ফুল, পাঁচানিয়ে গার।
 ডাঙর কুলে জরম ঐয়া, বিদ্যাহীন অর,
 রূপযৌবন থাইলেউ, তিরা পারা অর।
 শৌ-জিপুত তামকরুয়ানি, ইমা বাবার কাম,
 বিদ্যাহীন করে থনা, শত্রুতার নাং।

মৌয়েইরমা গুণবতী, সুধাময়ী ঐতারা
 গুণহীন, কৌলি-লাংপী, হরপ মালৈতারা।
 মালকর দোষে শৌ, ঐতারা পাগল,
 বাপকর দোষে বিদ্যাত, ঐতারা বিকল।
 বিদ্যা বিদেশে মিত্র, ধন-দৌলত নাগৈ,
 গুণবতী স্ত্রী মিত্র, অসতী নাগৈ।
 ব্যাধি এলে হজক মিত্র, জিপুত সাকেই,
 কর্মযুদ্ধে জ্ঞান মিত্র, বুদ্ধিল তরেই।
 কুরূপ কোকিলাগ, হাবিয়েউ জানি,
 নুংশি এলা দিরি হানতে, অতি আদরিণী।
 সতী পতিব্রতা মৌয়েই, কুরূপ কামিনী,
 ঘরর গিধানক ঐরী, অতি সোহাগিনী।
 কানা-খরা-লরা ডেঙা, ঐয়াউ থাক,
 বিদ্যান এলে পেইতারা, উচফামে ঠাক।
 ধন-দৌলত-মণিমুক্তা, চরৈতে পারে,
 বিদ্যাধন মণিকুটে, নাউ পার চরে।
 মাটি-বাড়ী-গাড়ী-ঘোড়া, মাঙেতে পারে,
 বিদ্যাধন মাঙনার, লেইকরলেউ তারে।
 আমার সম্পত্তি এতা, বাটলে কমর
 বাটিল মাহি লুয়র, চেই বিদ্যার ডঙর।
 রং-বং-ফুতি ফালি, পুরানা অলর,
 বিদ্যাধন ঙালর যত, তাক্করর পুছর।
 আজি আছে, কালিনেই, মাটি-বাড়ী গাড়ী,
 অসতীর পতি পারা, চমকার পুরী।
 পার্থিব সম্পত্তি এতা, কৌলির জর,
 নাইলেউ নার হাই, মিয়ামে সমর।
 বিদ্যার ডেকি ধননেই, ত্রিভুবনে আর,
 স্বয়ং কৃষ্ণ বিদ্যায়, তালকরল অপার।
 বিদ্যাসম বন্ধুনেই, বিদেশে বিভূয়ে
 বাসুদেবে পাঠশালে, দিল শ্রীকৃষ্ণরে।
 বাহুবল, ধনবল, আর দৈব বল,
 বুদ্ধিমত্তা জনে উতা, হার পার কেবল।
 দৈবকী শ্রীকৃষ্ণরে তারো, পাঠশালে দিল,
 কনাক কাল, পাঠকাল, শ্রীকৃষ্ণ মাতল।
 মালক-বাপক যত, শৌ শুমারার
 কনাকে শিক্ষাদেই, পাঠশালে তার।
 বাপক-মালক পণ্ডিত, শৌ-গড়া-দৌ
 জাতির-দেশর ভাবি, আমারতাতে শৌ।
 সযতনে শিক্ষাদেই, ঝারিয়া পুছিয়া
 বিদ্যান ঐয়া থাকা, দেশ ঙাল করিয়া।

রাধা না মালয়ে

মণীন্দ্র কুমার

মন মজেইলু, কুল মজেইলু, জাত মজেইলু তোরাং
না হারপেয়া, পীরিতি করলু, দোষ হাবিতা মোরাং।
জাতউ গেলগা, পাতউ গেলগা, এলু জিয়াত মরা,
প্রেম সাগরে, জাবুর দিয়া, এলু দিশা হারা।
তোরে মনেইয়া, ঘর বাঁধতেগা, এড়লু নুঙেইর জিনা,
জিনাউ পুড়িল, জানউ মরিল নাইলু কিতাউ কানা।
রাজার জিলক, গোপীর মৈমক, বরণ কনক চাপা
জুরার ফুলে, মৌ পিনাত, মৌ দাপা দাপা।
ব্রজর বালা, ভুবন আলা, নুপুর শোভে পায়,
কিনি কিনি, রিনিঝিনি আটলে রহের তায়।
কুলবতী, গুণবতী, হাবিয়ে মাতেছি মোরে,
থনাউ থছি, চাঁদভাতি বানাউপাছি মোরে।
যেপেই যেপেই পারা পড়ে, ফুটেছে চরণ চিহ্ন,
চুমাউ দেছি কর জোড় করে, নাছে ছিন্ন ভিন্ন।
কলো কাঁকালিত, পানী আনানীত, গেছিলুগা যমুনাত,
পথ রুদ্ধ এল, কলগ কানৈল, পইলু মহা লাকনাত।
কলঙ্ক রটিল, কলঙ্কিনী, মেইথঙে ছনুকালি,
নারলু নিকুলে, জীবন বিফলে, যৌবন জলাঞ্জলি।
পীরিতি পীরিতি, পীরিতি বুলিয়া, আগ পিছ নাউ চেইলু,
পীরিতির জ্বালায়, জ্বলিয়া জ্বলিয়া, এবাকা মরাত পইলু।



আগেকার দিনে ডাঙরিয়া পণ্ডিতে দিখিজয়
করাং নিকুললা। বিভিন্ন দেশে বুলে বুলে
রাজপণ্ডিতরে তর্কং আহ্বান করলা। তর্কং
পরাজিত অইলে পণ্ডিত এগরে জয়পত্র

আহান ইকরিয়া দিতারা। হাবিদেহর হাবি পাণ্ডিতরে জিঙে পারলে
ঔগ দিখিজয়ী পণ্ডিত উপাধি পেইল। এসাদে দিখিজয়ী পণ্ডিত
আগ নবদ্বীপের কনাক পণ্ডিতশৌ আগরাং পরাজিত অছিল। য়েগরাং
পরাজিত অছিল পণ্ডিত ঔগর নাঙহান অইলতাই নিমাই পণ্ডিত।

এসাদে দিখিজয়ী পণ্ডিত আগ মণিপুর হান হাবি জয়
করিয়া দুর্যোধন মহারাজার সভাং গেলগা। দুর্যোধন মহারাজার
সভাপণ্ডিতগর লগে তর্ক করানির ইচ্ছা জ্ঞাপন করল। দুর্যোধন
মহারাজাই এরে পণ্ডিত এগর লগে ফাগি আহান করানি মনেয়া -
আগরে দেহাদিয়া মাংল - ঔরে ঔগ মোর সভা পণ্ডিতগ। দিখিজয়ী
পণ্ডিত এগই চার থাংতে ঔগতে ভয়ংকর বলী পাঞ্চাল মানুগ। গারি
ঔগ, আতজাঙ ঔতা বলিল বলিলগ অছে। এগই হিনচাপা আগরে

বন্ধুর পীরিতি, না জানিয়া রীতি, না খাইও কুলবালা,
কুল-মান-ধন, জীবন-যৌবন, যিতৈগা আকুবালা।
বন্ধুর লাগিয়া, জাতি কুল দিয়া মানুরাং তাথি অনা,
বন্ধুর হৃদিগ, কারাংতে গীর, আগেস্ত চানায় কানা।
পীরিতি বিয়াধি, দেহাগং এলে, ছিড়তে না ছিড়তে,
জীবনে মরণে, পীরিতির ব্যাধি, দেহাগ পুড়িয়া মারতৈ।
পীরিতির রস, না জানিয়া পিলে, অমৃতে বিষ ঐতে,
হোনালো ঘরগ, বাঁধানি মনেইতে, জিগলো পুড়িয়া মারতৈ।
পীরিতি সগরে, না হিনেই, নাজানে, গারীগং গরল লাগতৈ,
আপকু পা ডাহিয়া, কক নুয়ারতেই, জিয়াত মরিয়া থাইতেই।
পীরিতির গতি, নেই রীতি নীতি, কিসাদে হৃদিগ জুড়ের,
বিবশ বিভূলা, করিয়া সখি, যোগিনী করিয়া ছাড়ের।
পীরিতির ফঙে, না পড়িছ মুঙে, মাতুরী মি বৃষ বালা,
কালিরা ভ্রমরে, আহিগী পড়লে পিদতেই কলঙ্ক মালা।
ভুবন জুড়িয়া পীরিতি করিয়া নিকুলেছি যতবালা,
হাবিয়ে পিছেদি কলঙ্কর হার নাপাছি ফুলর মালা।
মোরেলো বিচার না করিও তুমি, মি মানবী নাগৈ,
কালার মানসী, ঐয়াউতেকতি, জ্বলেছু জ্বিগৈ জ্বিগৈ।
রাধা রাধা বুলে পূজাতে দেয়ায়, কলঙ্কউ জাপি জাপি
তুমি রাধা ঐয়া, পূজানা পেইলাই, মাতলা পাপী তাপী।
উহানে মাতুরী, পীরিতির জালে, পড়ানিতে হবা নেই,
কুলবতী থায়া সংসার পাতিয়া, থানা হানে হবা পেই।

খটাস পুরাণ

ব্রজেন্দ্র কুমার সিংহ

ধরলেতে আকচিপাং নেই করে বেলতই। পণ্ডিতগতে নামালয়া
মালগহে মালছে। মাল এগরে আরাক চারিগ মালে ধৌ মর্দেদেনাং
লাগেছি। এগর লগে তর্কতে থাক কাদাং চেপনিও মহাবিপদহান।
এগই চাপড় আহান দিলেতে ছনুগ করতই। মূলেতে ঔগ পণ্ডিতগ
নাগই, মধ্যম পাণ্ডর ভীম।

দিখিজয়ী পণ্ডিত এগই খানি দুরেইংত হমা দিয়া মাতল
- তা পণ্ডিত।

ভীমে পণ্ডিত এগরে খাঙয়া চেইল। চানা ঔহানাং পণ্ডিত
এগ উঙো পড়িলগা। ঔগয় মাংল - হাই মি দিখিজয়ী পণ্ডিতগ।
মণিপুর এহান জয় করিয়া - দুর্যোধন মহারাজার রাজসভাং
আহেছুতা তর্ক করিং বুলিয়া। হান্তে, দুর্যোধন মহারাজাই পণ্ডিত
গিরিরে দেহা দিল থাংতে - মি তর্ক করিং বুলিয়া আইলুতা। ভীমে
দুর্যোধন মহারাজার ঔগদে চেইলো। দুর্যোধন মহারাজাই মুকসি
মুকসি দিয়া ভীম বার পণ্ডিত এগর কুমেইহান চার। ভীমে
হারপেইল, দুর্যোধন মহারাজাই পণ্ডিত এগরেল ফাগি করানি

মনেয়া করেরতা। খাংতা পণ্ডিত এগরে ছ্কার আহান দিয়া মাংল - সমুদ্রকমা পুরানদো খাংবারা। পণ্ডিত এগ ঔঙয়া মুরগ বুলেয়া পড়িল। হইমা ! এরে বলীপাঞ্চাল মাল এগ কতি ডাঙর পণ্ডিতগ অগেছেগাতা। মাংল - লেরিক ঔহার নাঙহানপেয়া নাহুনেছে। খানি থায়া মাংল - না পণ্ডিত গিরি - ঔগয়ো মোর লগে তর্ক করাং আহেচং। যাগা ঘরে গিয়া হবা করে লেরিক লেইসেউ তামকরিয়া মোরাং আহিছ।

পণ্ডিত এগ লাজহানে ঔঙহানে ডরহানে মরণ ফাঙইল। দুৰ্যোধন মহারাজার সভাং এতাপারা ডাঙর পণ্ডিত আছি। তানু পাকরেছি লেরিক ঔতার নাঙপেয়া হার নাপাছে। যেতাউ অক - এপেই নুয়ারল নুয়ারল। আরক আকপেইতে গিয়া তর্ক করিয়াতে জিঙে পারতইগানাই। এগরাংস্ত মাংল পুরাণ ঔহান হিকিয়া যানা হান লেপইল। মাংল - পণ্ডিত গিরি। পণ্ডিত গিরিরাংস্ত ঔ পুরাণ ঔহান হিকানি মনাউরি।

- ঔহান অইলেতে মোরাং অজা নেইকর। মোরকা সিদ্দা আহান, চৌল যাং খেই মল, ঔহানর উপযুক্ত আচা আদাক বার বাঘ মারকা ফেইচম আহানল মোরে অজাগ করে বরিয়া।

- মিটে লেইরাপা পণ্ডিতগ। পণ্ডিত গিরিরতা অইবগা সিদ্দা আহানতে কুরাং পেইতৌতা ?

- পইলা গেছিলেগা রাজা ঔগরাং মাতলেগা তা আপপানৌ হাবিতা জুগং করে দিতৈ। বর্ণবোধ আহানৌ আনিছ।

- বর্ণবোধহানতে কিয়া ?

- পইলাংস্ত অকররাংতা।

পণ্ডিত এগর দশা এহান দেহিয়া দুৰ্যোধন মহারাজা নিয়াম হারৌ অইল। ঔতার গজে তার রাজসভার সন্মান হানৌ ভীমে থদিল। এহানাং - তারতা আনন্দর সীমা নেয়ইল। ডাঙর সিদ্দা আহানর জুগং করিয়া আককুড়িহান কামপংল সিদ্দা ঔহান দিয়া পেঠেইল। লগে রাধেকুরা বামন আহৌগ। সিদ্দা ঔহান ডাক ঢুল বারেয়া ভীমরাং নিয়া ফৌকরে দিলা।

ঔতা খেয়া পিয়া হদেয়া ভীমে মাংল - বর্ণবোধহান নিকাল। পণ্ডিত উগরে মাংল - এরে মেয়েক এগং আঙুলিগ দে - মাত - ক।

পণ্ডিত ঔগই মাতল - ক।

- যাগা অজিকার পড়াহান লয়ইল। কালি বার আহিছ।

পিছেকার দিনে মাংল - ক বুল। পণ্ডিত ঔগই মাংল - ক।

যাগা অজিকার পড়াহান লয়ইল। কালি বার আহিছ।

পিছেকার দিনৌ ইমে ক বুলুয়েয়া পড়াহান লইকরল।

এসাদে করে দিন এতা যারগা, মাহা যায়গা, বছর যারগা। পণ্ডিত এগই এবাকাতে হবা করে হারপেইল - তার অজা ঔগ আসলে লেরিক না তামকরেছেগ। পুরাণহান বুলল ঔহানৌ সুম্নরহান। দুৰ্যোধন মহারাজাই ফাগি করিয়া তারে এরে ডাঙর বিপদ এহানাং

বেললতা। নিককা ক - বুলে বুলে থাইল খাংতে তা তাম করেছিল বিদ্যা ঔতাউ মাঙইল। দাবদিয়া গেলেগাউ দুৰ্যোধন মহারাজার আতেংস্ত, ভীমর আতেংস্ত কুরাং গিয়া জিংতা অইতইগাতা। কি বিপদহানাং পড়িলতা। এবাকাতে কিসাদে উদ্ধার পানা। না ইমে এসাদে অয়া মরানি। খালকরিয়া কুল নাপার। খালকরতে খালকরতে বার বছর গেলগা। আর জিংতা অয়া থায়াতে কিতা করত। বিদ্যাহান নেয়াতে ইমেউ মরাগ। যেতা অইলা অইল - মরলে মরলু বুলিয়া বামনএগ কালচিংঙেইর পরে দাপদিয়া গেলগা। দাবদের এগ, দাপদের এগ। খানা নেই পিনা নেই, জিরানি নেই, বহানি নেই-ইমে দাপদের। এসাদে দাপদিতে দাপদিতে টেঙারা আগর তুয়ারগ পেইলগা। ঔপেই খানি বয়া-কাদানি অকরল। কাদে কাদে মাতেরতা - ভগবান দেনে উদ্ধার করেদে দীনবন্ধু, তি জিংতা নাকরলেতে আর কুংগই মোরে চেইতাইতা।

তাজ্জা ঔগং দ্বারকাং সত্যভামাই কৃষ্ণরে বাত হাজাদিরিতা। ভগবান শ্রীকৃষ্ণ এগ বাতে বয়া আচমন করিং বুলতে বামন এগর ডাকহান কানহানাং ফৌয়ইল। ভগবানে মুকসি দিয়া সত্যভামারে মাংল - বাসা মোরতা বাতখানাহান নাইল। এবাকা মি নাগেলেগাতে কুমেইহান সম্পূর্ণ নাইতই।

ঔতা বুলিয়া বুড়া বামন আগর রূপহান ধরিয়া এরে পণ্ডিত বামন এগর মুঙহানাং আহিল। আয়া আংকরল - হা ! এপেই বয়াতে কিয়া কাদরতা ? কিত্র আছে থাঙ ?

বামন এগই কাদে কাদে যারিহান হাবি ভগবানরাং দিয়া মাংল - বার বছর এহান ইমে ক এগল সানেরতা। মোর বিদ্যাহান হাবি মাঙইল। মি মূর্খগ অইলু। এসাদে থায়াতে কিতা করতু বুলিয়া দাপদিয়া দুরেই দেশ আহানাং গিয়া লুকেইংগা করে। ভগবানে মাংল - কুরাংতে লুকেইতেইগা। দুৰ্যোধন মহারাজা ঔগ সমাগরা পৃথিবী এহানর রাজাগ। ভীম বুলর ঔগউ বলীরমা খম থেঙেছেগ। আকপেয়া লুকেয়া জিংতা নাইতেইগা।

- হান্তে মোর উপায়হানতে !

- হাই, তানুরাংস্ত যাথাং লয়া ছুটিয়া আইগা।

- হইমা ঔপেই বার গেলেগাতে মোরে ছুনুগ করতই ভীমে।

- কিংতাউ নেই হাট ! মি গিয়া ছুটিয়া আনেদিংগা।

- না, না। মিটে মরতৌ, লগে তোরেউ মারতাই।

- কিংতাউ নাকরতাই। ভীম বুলর ঔগর বেইবুনি ঔহানে

মোরে নিয়াম যাকরতারাগ। মি মাংলে তোরে কিংতাউ নাকরতাই। বামন এগ যানা নাকরের, ছদ্মবেশী ভগবানে তারে যানরকা জোর করের - তিতে দাপদিয়াউ লুকা নুয়ারতেইগা। যেপেই পেইলৌ ধরিয়া আনতাই। ঔতাংস্ততে গিয়া ছুটিয়া আহানি ঔহানে হবা নাইতই। ভগবানে বামন ঔগরে এসাদে বুঝেয়া করিয়াতে আনলো। দুরেইংস্ত দেহিয়াও ভীমে চিনল এগতে ভগবান শ্রীকৃষ্ণ। হারনাপেইল সটান দিয়া চিকারি দেনা অকরল - কুরাং গেলেগাতা পড়ুয়া ঔগতে। বিয়ানকার পড়াহান নাদিয়া মাঙেছেগাতা। আজিতে পেইং করে।

চিকারিগ জনলতাই বামনগর চৈতন্যগ উড়িয়া গেলগা।
দাপদিং বুলতে ভগবানে আতজাং ধরিয়া খাম করিয়া ভীমরে মাংল
- তা যাইয়া এহান কিহান! কিয়া বামন এগরে বার বছর এহান ক
- এগল ছানরতা।

- বামন এগ পণ্ডিতগ মালয়া অহঙ্কার করেরতা। তার
অহঙ্কার ঔহানরকা এরে দশা এহান অইলতা। গারিগং ভক্তিহান
নেই, ইমে অহঙ্কারল বুজেছে ঔগরে ভক্তি হিকাউরিতা।

- কিসাদে হারপেইলেতা ভক্তিহান নেই বুলিয়াতে ?
- হাই, বার বছর এহান ক - এগল ছানোরিতা। কইতে ক
বুলতে কৃষ্ণ নিংসিং নার ঔগতে কি পণ্ডিতগ।

- এহান ছনিয়া বুজা পড়িয়া পণ্ডিত গৈ কৃষ্ণ কৃষ্ণ বুলিয়া
কাদানি অকরল। ভগবান শ্রীকৃষ্ণই তার ছদ্মবেশ ঔহান এরা দিয়া
তার গোপীমনোহর রূপ ঔহান ধরল। বামনগ প্রভুর খয়াহানাৎ
পড়িয়া কৃষ্ণনাম সলকরে সলকবে বৃন্দাবনে সালইল।

গৌহাটীর সাহিত্য সভা

ডঃ মণি সিং, বসন্ত বিহার

মালিগাঁওর রথ চেইয়া আলৈতাঙায় বুলতে গৌহাটীর
গুলাত আটকে পড়লাগা। তেজপুরেস্ত মানস অলকা, নওগাঙেস্ত
দেবজিৎ, উর্মিলা, বরপেটাংস্ত অমিতাভ, দিপালী, নুবা মারুতী কার
আকেইহানিলো রথো চানা গৌহাটীর মারুপ-মাছাঙ বারো সাগেই
কুটুম উনা অনি বুলিয়া হাউস করিয়া আহেছি। হাবিয়েই নুবা নুবা
বিয়া করেছি। হুদা ডঃ মণি সিং দিল্লীও আহেছে, পরিমলরে উনা
অনীত।

আবাচর সেন্দাহান। মালিগাও চারি আলিত রথহান
আচুলিয়া আনিয়া শ্রীশ্রীরাধামাধব সেবাস্রমর গেইটহান পেইতেই
বরণ বেলা বেলে। - জয়দেব, পালির খেচুরী খানা তাল করলে
আজি ঘর আলনি নাইতে, পথে গুলাত আটকে পড়তাঙাই। বি,
বরুয়া রোডে বারো শিলপুখুরীত, বুড়ি আহান বরণ দিলেই আঠু
আঠু পানি অর। তুড়াক যানায় বালা - বুলিয়া মনিদীপায় হুচিয়ার
করলী। পরিমলে - হাই, গিয়া পড়িকগা - বুলিয়া নিজর নিজর
গাড়ীহানিত কাইলা। গাড়ীহানিত কানা ফাংনেই চুংগল চালিয়া বরণ
বেলা বেলে। বি, বরুয়া রোড লালৈয়া উলুবারী, চারিআলি
লালৈতে পথে পানী কাইল। নবীন নগরে হমেইতে হমেইতে পথে
ফুট আহান পানী। কোনমতে গাড়ীহানি গেইটর ভিতরে বরেইয়া
ঘরে হমেইলাগা। বরণ এডানির নাঙ নেই। হাবিহান ডুইং ক্রমে
বৈলাগা। পরিমলে কামর শৌগ, মানুশৌরে ডাহিয়া মাতলো - কফি
কাপ আকেইহান তুড়াক দে।

সরযুয়ে কফি আটকাপ বারো ভেজিটেবল কাট্লেট প্লেইট
আহানলো হমেইলী। এবাকা এতা খেইয়া জিরেই। পিছেকারতা
পিছে পিছে ঐতে। গারী না হিনপেইলেউ মনেতে হীন - পাখাইবায়।
তোমার হাবি আশা পানীত বুড়িল - বুলিয়া মাতিয়া টী টেবিল
হানাত কফি বারো কাট্লেট

থ দিয়া তেইয়ো কাদার সোফাহানাত বৈলী।

- যুগ যুগ জিয়ো! অন্ধকুপা তাঞ্জাহানাত ইচেয় মেঠেলহান
আনলেতা। মি মতিঙ মতিঙ বুলিয়া আছিলুগ। কাংপালীর খেচুরী
খেইতাঙায় বুলিয়া আইলাঙ আরো বরণহানে পানীছানি করেবেলে

- বুলিয়া মানসে কফি, কাট্লেট বিলানি অকরল।

- একখানি করে নুয়ারতৌ বুলিয়া তি কিসাদে খালকরলেতা।
আগেতে আইবেতায় ইচে, ইচে বুলিয়া ইনাফীর চুটীগ ধরিয়া ডিমর
বরা, ইচার বড়া খেইয়া গেলেগাগ। এবাকা কলেজে লেকচারার
ঐয়া অলকারে বিয়া করে, বেলেইয়া পাছরলেতা। বুলিয়া সরযুয়ে
অলকারে চেইয়া মুকচি আহান দিলী।

কফী পীতে পীতে ঘর মাপু পরিমলে মাতলো - আজি
রাতি আর নাউ যিযোগা। এবাকা পথঘাটর যে দশা ঐতে, গাড়ী
পথে বুড়ে, পরতেগা। এবাকার গৌহাটী, ইমে বরণ বুড়ি আহান
হবাক দিলেয় জু-রোড, চান্দমারী, অনিল নগর, নবীন নগর, তরুণ
নগর, লাখটকীয়া, পানীলো ভাহিতারা। রাতিহান এপেই কাটেইয়া
কালি বিয়ানে যিযোগা। মানুশৌরে ডাহিয়া মাতলো - গেষ্টরুংগর
ফামফুতি, বাথরুম কিতা কাতা যুংকরে দে। মনিদীপারে মাতলো
- যুং করে, খেচুরী খানি রাখ, আলুর দম আহান কর, ইলিশাহানি
কড়াক ভাজে দে বারো আঠিয়া কলার থরোল ইরলপা আহান,
মিয়াংপা নাইলে আদা দিয়া করেদে। দিপালী উর্মিলা, অলকারে
চেইয়া মাতলো - এতালো রাতিহান কোনমতে চলক।

অলকায় মাতলো - দাদা ! বরণ বুঝিহানে - আমার
ভাগ্যহান খুলেছে। পথ বন্ধ ঐলেউ হীন নেই। কাঙর পালিহান,
জয়দেব নাইলেউ যুগং অনাত পড়েছে। কথা হানিত য়ৌয়েয়া
অমিতাভে মাতলো - দাদা, জয়দেবৌ দিতাঙায়!

সরযুয়ে কফির কাপ বারো কাট্লেটর প্লেইটহানি ট্রে হানাত
কাকরে কাকরে কবিতা আহান অরাণি অকরলী-

‘নীল নবঘনে আষাড়গগনে তিল ঠাই আর নাহিরে।

ওগো, আজ তোরা যাসনে যাসনে ঘরের বাহিরে।।

Thou art O'cloud! Thickest the sky,
Ride not ! Ride not !! The Westerly blow,
Slip not Saddle ! Thy chance none,
Shy not shower ! Thou can't fly.

উর্মিলায় পেল্ নাইয়া মাতিরী - কতি পাকৈয়া তাল-তাজা-

তুহমর তুল চুনা করিয়া লেঙকরেছি। দিদির নারগৎ আরাকৌ
নুংশি লাগের।

- আমারতাউ এসাদে চুনাক লেঙ করা কবিতা আছে।
বুলিয়া আমার ঠারর কবিতা আহান অরেইলী :

বরণর মাহা, বরণে মামছে হাগহান কুম্ছালি।
চুংল ঢালিয়া বরণ বেলাছে দিনহানৌ ঘোর কালি।।
পিঠির বারাহান মিমুৎ করিয়া হাগহান বেড়ি দিয়া।
কাল কাল মেঘ, পাগল ছুটেছি, কাল ঘড়াত চড়িয়া।।
বাদলার দিন, বরণর পালা, ঘরর কোনগয় বালা।
আজিকার দিনে নিকুলানি নেই, আলি যায় বছি পালা।

কবিতাহান হুনিয়া দিপালীয়ে মাতিরী - কতিরৌ হোভা অগেছে
গাতা। ব্রজেন্দ্রর এসাদে বরণর দিনর কবিতা আহান মনে পড়িল।
বুলিয়া দিপালীয়ে কবিতাহান আবৃতি কৈলী :

লপুক বুজে হাওন মাহার বরণ আহেছে,
ধলেশ্বরীর পার ঝিয়োগী চপ্প পাহেছে।
সেন্দা আহিল হাবিগদে ইমাম মাময়া,
দৌর বর্তি তুলসী পুঙে লাগের টাঙয়া।
নেই তেরাগি, হাগ এহানাৎ নেইতা খানি ঙাল,
বারিহানাৎ জিন জিনিহান অছি পালে পাল।

মানসে মাতলো - কবি ব্রজেন্দ্র কুমার সিংহ গিরকতে আমার ঠারর
অতি উচ্ থাকর কবিগ বাঙ্গালীয়ে পেয়া তাঁর কবিতা আতি আদর
করিয়া পাকরতার। হৌদিন সাহিত্য সভার পত্রিকা আহানাৎ এসাদে
কবিতা মানে ছড়া আহান পাকরলু, বুলিয়া মনিহারর কবিতা আহান
আবৃতি কৈল :

নুংশি কানাই আয়তা, পূব বারাদে চাতা,
মেলিয়া আছে সূর্য্য মামা, কতি মিঙাল দেবতা।
হঠাৎ কিয়া মেঘালা আয়া, আঁধার করে দেবতা,
উহান দেহিয়া কেরবং দাদায় গুর গুরকিয়া রহেরতা।
কিহান মাত্তাঙ দৌও জিলকার গুড় গুড় বজ্র রহের,
এতাহাবি পানীগ করে, কুংগয় বরণ ডালের।

সরযুয়ে মাতিরী - আজিকার জয়দেব হুনিহান জবর নুঙেই আছে।
উঠানি নাহের। কিন্তু এবাকা জয়দেব হুনিয়া থাইলে, পেট না বুজতৈ।
মানুশৌয়ে হাবিতা লাককরে নুয়ারতৈ। মি চাংছাঙে খানি যিংগা।
তুমি পালা হান না এড়িও মি হাদি হাদিৎ আইয়া জুন্তৌ। বুলিয়া
চাকছাঙে গেলিগা।

পরিমলে সরযুয়ে মাতলো : হবা আছে। তি মনিদীপারে
খানি পাঙলাক করগা। মানুশৌ আকখুলাগয় যুগৎ করে নুয়ারতৈ।
বার জুন - ইরলপাহানি তি নিজে করিছ। তোর বৈজীয়ে ফুটহান
আনে নুয়ারতৈ। তেই খেচুরীয়ে, ইলিশার ভাজা, করতৈ। আলুর
দমতে মানুশৌয়েউ হবা করে রাখে পারতৈ। সরযু হাই বুলিয়া খুম
করলী।

অমিতাভ, এহান হাবি ইংগ ঐয়া হুনিয়া আছিল। সরযু
যানার পিছে মাতলো - ডঃ কালী প্রসাদর এসাদে কবিতা মোর

আহিত না পড়েছে। এসাদে প্রকৃতির গঞ্জে, হারৌ পিয়মলো কবিতা
না লেংকরেছে পাউরী। তাঁর কবিতা এলাত, ঈশ্বর কথা, ভগবৎ
প্রেম, বিরহী প্রেমিকর মনোদর্শন, অপূর্ণ আশা - আকাঙ্ক্ষা, মিয়াম
দেহুরী, যেমন -

মনাছৎ সখা, অতীতর কথা, হাবি পাছুরীয়া আছু,
জীবন-বীণার তারগাছ মোর, ছিড়িয়া বেলেইয়া থছু।
নীরব রাতির আঁধার ভবনে, একা মোরে পেয়া

গোপনে গোপনে,

যে মধুর কথা, মাতেছিলে সখা, মনে আছে - হাবি আছে
প্রতি পলে পলে তোর মধু বাণী হাদিগোৎ ধরিয়া থছু।
* * * * *

হায়হান আজি জীবন আবেগে দিকে দিকে আহি দেখু
তবু সখা, মোর কাকেয়ে কাকেয়ে তোর রূপ মনে থছু।

-মিতে তোমার সাদানে, কবিতা, যারী মিয়াম না পাকরেছু। তেবুউ
মদন মোহন মুখার্জীর কবিতা আহান :

খাল পারর কাং
যেইতেগাতে আকুতা ঐয়া
আইতে ঠাং ঠাং।

মোর মনে গাঁথিয়া আছে। কবিতা এহানেই মদন মুখার্জী অমর
কবিগ ঐয়া থা গেলগা বুলিয়া খাল করৌরী। এসাদে কবিতা আমার
ঠারে আর নাছে। হয়ত নাইব। খাল পারর অমর কাঙর গঞ্জে এ
অমর পারেঙ এহানি তাঁরে অমর করে দিল।

আসরগ কতহান নীরব ঐয়া থাইল। হয়তবা হাবিয়ে
কতমাহা আগে মরণর পারে গেলগা কবিবরর কথা খাল-করিয়া মনে
হীন পকৈলা। নয়তবা সরস্বতী গিথানকে তাঁর আহিখমর লগে
অকালে কলমগ নিয়া গেলিগা হানর দুঃখ পেইলা। ইত্যবসরে খুন্তেই
আহানলো ঘাম পুছে পুছে সরযু হমেইলিহা। হাবিহান ইনচিক,
চিকৈয়া আছি হান দেহিয়া আহিয়া মাতলী : কিতাতে, অমটিক
চালাক ক, ঠুইলাইতা। হবে খেচুরীর করফুগ হৌ অনি অকরেছে।
কইতে মানস, তোর দিলস লক্ষ্মীন্দ্রর এলা আহান হুনিক বেনাই।

মানসর নারগ হবা। তা প্রায়েই লক্ষ্মীন্দ্রর এলা দেব।
কালীপ্রসাদর এলাউ দেব। তেবউ, লক্ষ্মীন্দ্রর এলা তারাঙ জবর
নুংশি লাগের - মানসে লক্ষ্মীন্দ্রর এলা আহান দিল -

আহ আহ কনাকশৌ

গাউরা পুরী জেলেই মো

মিঙাল বাঁধিয়া আঁধার বাগিয়া

আন আন নুবা পৌ।

পুন্না দিনর বৌবাতাল মৌকায়াতে নাথায়

জনা কথার ধুনা ঔতার কেইরাকেদে নাকায়।

ভালো-ভালো, ভালো-ভালো বুলিয়া হাবিয়ে আতর তালি দিলা।
হাবিহানে তারে কালীপ্রসাদর এলা আহান দেনারকা মাতলা। সরযুয়ে
এলার ফরমাস দিলী -

- যে দুয়ারহান খুলে দিলে আজি, চিরদিন খুলা থাক।
মানসে মাতলো - পারেও হাবি না ধরেছ। পাংকরানি লাগতে।
উন্মিলে ইচেয় পাংকরাগি লাগতে। হায়দে অকর, পাংকরতাঙাই -
বুলিয়া সরযুয়ে মাতলী -

মানসে এলাহান অকরল -

যে দুয়ারহান খুলেদিলে আজি
চিরদিন খুলা থাক।

আজিকার রাঙা বেলীর মিঙাল
দিনকার রং পাক।

সরযুয়ে, উন্মিলায় পাংকরলা :

আজিকার মধু মলয় পবন
দিনকার দেক প্রেম শিহরণ
দিনকার তোর পাহিয়ার ডাকে
নুবা নুবা পৌ পাক।

মানস, সরযু, উন্মিলা তিনোগীয়ে লৈ কৈলা -

এসাদে এলার ছন্দে ছন্দে
ফুলর মধুর গন্ধে গন্ধে
সীমাহীন তোর কঙালা প্রেমর
দিনকার ডাক পাক।

সুরে সুরে পরিমলর বৈঠকখানা গুণগুনেয়া উঠিল। ঘরগ সুরর
লহরীত পাহিয়া পড়িল। মুঞ্চ এয়া এলাহান জ্বলা। মানস, সরযু,
উন্মিলা এলাহানাত বুড়িয়া এমন নুংশি করিয়া, তাল-মান-লয় থৈয়া
এলাহান দিলা, শ্রোতা হাবি বাক্যহীন মূর লড়েইয়া থাইলা।
এলাহান লমৈল আরো, পেল নাইয়া মাতলা, আরতাউ জ্বানীর
বৌরাং থাইল।

অলকায়, দিপালীয়ে মাতলা : পরিমলদা ! 'রথৌ
দেখা, কলাউ বেচা' কথা এহান আমারকাই ইকরেছিল। পাউরী।
মালিগাওর কাঙ চানাত আইয়া আমারতা হাবি বারাদে কানা আছে।
রথহান চেইলাং, এলা-কবিতা জ্বলাং, এবাকা খেচুরী ইলিশা,
খেইতাঙাই। লাভে লাভ। এহান মালিগাওর কাঙে কৈলহান।
খালপারে ঠাং ঠাং, মালিগাওয়ে চাং চাং। থক্ক পেরেভী আহান
অরেইলো-

মালিগাওর কাঙ

আইতেতে আকতা এয়া

যেইতেগা ঠাং ঠাং

পরিমলে ফাঁক ফাঁক করে আহিয়া মাতলো :- বাঃ বাঃ সাবাস, আমার
বনকগী। আকসাটে কবিগী অলৈলায়। মনিদীপা, সরযু, দিপালী
বারো অলকারে খেচুরী য়াম দিয়োক। তানু নিজর কবিতা অরেইলা।

মনিদীপায় গড়েইয়া অভিমানর সটন দিয়া মাতলী : এসাদে
নাইতে। এসাদে কবিতা মিয়ৌ বানা পারুরী। পরিমলে - দেতা
চেইক - বুলানিয়ে হাবিহানে মাতলা - হনিক হনিক -

মনিদীপায় খানি খালকরিয়া বানেইলী :

ঠেকিল রাতি দম অজা হৌরিয়লর ঘরে

চুচর ফুঙ্কাত চাটাত দেছি থাংচি পারে পারে। অপরাপা
রাতি নঙেই পুংলেল খেইল মাছগী পুড়ে
বিয়ান ফুইতে দম অজা গেলগা হিংলার পারে।

হাবিহানে তাজ্জব এয়া আতর তালিলো কান কালুয়া কৈলা।
পরিমলে মাতের - তি তে না ভিতরে ভিতরে সাংখাতিক জেলাগ
অছং। এদিন হাবি আকতাউ হারনেই আপাঙর সটন দিয়া তাঞ্জাহান
চেয়া মাজিগ দেহা দিলে। হাবিহানে - বৈজীরে আর এড়া দেনা
নেই। আরাক আহান জ্বুয়ানি লাগতে - বুলিয়া দাবী করলা।
মনিদীপায় - এবাকা মোর কবিতা নাগে। রাতি নয়টা বাজেছে। আলু
না হিজেছে। আলুর দমহানি করে বেলেইং - বুলিয়া তুড়ি-ঘরি
চাকছাঙে গেলিগা।

হাবিয়ে কন্তহান কুম মারিয়া মণিদীপায় দিল
আনন্দর ঠুমহান লেহে লেহে থাইলা। পিছে দেবজিতে মাতলো -
বাহেই আমার জগৎ মোহন অজার এসাদে নুঙেইপা পারেও কতহান
আছে। হনিক - বুলিয়া অকরল :-

হউ নাসেতা চিন্তানেই
খেই পানীৰ পাছা।
জার অসেতা চিন্তা নেই
হেজীং আছে কাছা।

বাঞ্চারামে পেল জিপুত
বাঞ্চা না পুড়িল
লাঞ্চনালো দন্ধ অয়া
বিদেশ নিকুলিল।

মোহর আগ দিয়া রাজায়
মাদে আগ আনল
ঘোরগ অয়া মনোহরে
ঢোলগ বাড়েইল।

গাছ বিরকে পাহিয়ায়
দিলা দ্বি-তিন পালা
ভাতউ উলা, হৌও উলা
হাবি আলা সালা।

হনিয়া অমিতাভে মাতল : জবর হবা আছে। এতাত কিন্তু রবিঠাকুরর
জুড়ি নেই। বুলিয়া অরানি অকরল :

স্বপ্ন আমার জোনাকি
দীপ্ত প্রাণের মণিকা
স্তব্ধ আঁধার নিশীথে
উড়িছে আলোর কণিকা।

ক্ষুদ্র তার পাখায় পেল
ক্ষণকালের ছন্দ

উড়েগিয়ে ফুরিয়ে গেল
সেই তারি আনন্দ।

চাহিয়া প্রভাত রবির নয়নে
গোলাপ উঠিল ফুটে
রাখিব তোমায় চিরকাল মনে
বলিয়া পড়িল টুটে।

কে লইবে মোর কার্য্য কহে সন্ধ্যারবি
শুনিয়া জগৎ রহে নিরন্তর ছবি।
মাটির প্রদীপ ছিল, সে কহিল স্বামী
আমার যেটুকু কার্য্য করিব তা আমি।

কেরোসিন শিখা বলে মাটির প্রদীপে
ভাইবলে ডাকো যদি দেব গলা টিপে।
হেনকালে গগনেতে উঠিলেন চাঁদা
কেরোসিন বলি উঠে এস মোর দাদা।

অলকা, দিপালী, উন্মিলা, বারো সরযুয়ে মাতলা : জুড়ি
নেই তারো রবিঠাকুর বিশ্বকবি। আমিতে এবাকা - মহাজনঃ যেন
গতঃ সঃ পস্থাঃ - বুলিয়া পথ চলেছি। অলকায় মাতলী : কবি ব্রজেন্দ্র
কুমার সিংহ গিরকৌ এসাদে কবিতা হবা ক ইকরেছে। শুনিক :

এতাহবি জিন্জিনি আমি থাইতে
জোনাকহানৌ কিয়া গজে কহিতে,
আমারেল নাইলেতে আঁধার অয়াথাক
হাদিৎ তি গজে কায়া নাঙ পানানাক।

আমার কহার গজে নেয়ছে সাগর
গাত এগ আছি বুজে, আমিহে ডাঙড়।
জাতোয়া হাবির নার রহে রহে থায়া,
কৌলীল গজে আছি আরতাৎ নায়া।।

পরিমলে মাতের : এসাদে বানার আরো কবির ব্রজেন্দ্র কুমার সিংহ
আমার ঠারর হাবির গজর কবি।
কথার হাদি ফেরিয়া মণিদীপা হমেইলিহা - রাতিহান দশ বাজি

লালৈল। আজিকার তোমার জয়দেবহান এপেই খামেবাই নাই।
আত জাং-শেঙিয়া মেইথং কিতা থেয়া তপ্তায় তপ্তায় খেচুরী হানি
খেই। খেইয়া নাইলে দ্বিতীয় পালাহান অকরিও।

হাবিহান উঠলা। আত জাং শেঙিয়া অহিলা। উন্মিলা,
অলকা, দিপালী চাংছাঙে হমেইলাগা মণিদীপা বারো সরযুয়ে
পাংকরাত। খানার টেবিলে প্রেইট পাতেদিল মানুশৌয়ে। অলকায়
খেচুরী বিলেইল। উন্মিলায় আলুর দম বিলেইল। পরিমলে
মানুশৌরে মাতলো - আদা-জামির আকেইটুমা দে, নাইলে হেইনৌ
মকছির আচার খানি খানি দে।

মানসে মাতলো - আজিকার খেচুরী গংহানে, হোয়াংহানে
আমোদিত করল। পেটগ রাউ রাউ করের। বাংলাদেশী ইলিশা
ধৌয়ে মৌ করল। দেবজিতে মাতের ইরলপা হানি মারৈয়ে মাপাঙে
অপূর্ব আছে। মানসে সরযুয়ে মাতের - ইচে আইতে থাইনাকার এম,
এ পাকড়ানির দিন হানি নিংশিং করার। ইলিশার ডিমর বরা কিতা
নেইতা?

সরযুয়ে আহিগী পাকেইয়া নিরালে তুলিয়া মাতলীঃ- তোর পেটগং
রাঙা-কাল তিল মাহি থা থাইব। আধা বুড়া ঐলে পেয়া লোভহান
না গেলগা। আষাড় মাহান পাহরলেতা। এবাকা ইলিশার ডিম নার
না। ভাদ্রতত ইলিশার ডিম অর। ঔবাকা খেইতেই।

অমিতাভে মাতের : মানসতে এবাকাউ অঙা, অঙা করের।
ডিম ঐলে ইলিশার এমটিক খৌনার নার হোয়াং নার। গাডুয়া
পেটগী দেহিয়াউ হার না পার এ ইলিশাগরডিম নাছে। উহানে তা
বাজার করলে অলকায় ঠিক না পেইয়া গুজুরী।

- তিয়োনা, সেপহান পেইলু বুলিয়া ঘরর কোনর দুখাগ
বাজারে ফুটার বুলিয়া অমিতাভরে তেরাদে চেইয়া, সরযুয়ে মাতল
- উতা ঐলে খেচুরী আরাক তারৌ আহান দে।

সরযুয়ে খেচুরী, তারৌ আহান বরাদিয়া মাতলো - বৈজীর
কবিতা হানার তলর পারেঙ হানি মি মাতিঙ, তি ছন। বুলিয়া
অরেইলী -

- হৌরকে দেখল আঙাঙ কজা, উঠের পড়ে পড়ে,
আনল ডাহে গাঙর ওঝা, দম্র চেইল তারে।।

পেটে পুংলেল, গারীং মাজা, লাজপার হৌরকরে,

আর না খেইতৌ মিটাকরে, য়েগ হেগর ঘরে।।

হাবিহানে ফাঁক ফাঁক করে আহিয়া উঠলা। মানসে মাতের এগ য়েগ
হেগর ঘরগ নাগে, আমার বিনির ঘরগ - বুলিয়া উঠতে উঠতে
কবিতার পারেঙ আহান অরেইল :-

এপেই মৌ, মৌজমে নেই, বিনির অন্তরে

কনাকতৌ মোরে আতুড় করেছে বিনির আদরে।।

হনার অরিণ্ডী

শ্রীহন্দ্র কুমার সিংহ

দেশে দেশে বুলিয়া - গাঙে গাঙে বাসক দিয়া, দিয়া আটরী। 'বাসকুলী' বুলিয়া হাবিরাং পরিচয় আছে। ঈশ্বরর লীলা কীর্তন করে করে ভক্তরে কাদুয়েইরী নাছার ভঙ্গিলো হাবির মন চরকরী। এলা দেনা তেইর জনমকার নেশা - হাতে হাতে পেশাহান অয়া পড়েছে। বাসকুলী উগর নারগো নুংসি উতাহে নুংসি তেইর রূপউহান - রূপউহানর লগে আছে তাই তেইর যৌবন - কঙালা নাগৈ, মঝা নাগৈ - পুরা যৌবনে ডেফা! যৌবনর জোয়ারে, নাছার তালে লয়ে ডেউ খেলার। আতে জাঙে, আহিত, হাবি দেহগো বুজিয়া ডেউর পিছে ডেউ নাছের- ও ডেউ উতা যেবাকা বিদগ্ধ গা পুড়া পোয়ার বুকগত আয়া উবুরি পাকদিয়া পড়ের - উতারে সমালানীর মত হিম্মত আর কতিগর তাউ বা আছে। বাসক দেনাত নুয়া নিকুলেছেগ উহানেতে লাজর ভাবহান নাগেছেগা - ওভাব উহানে তেইর রূপ উহানরে আরাকৌ অপরূপ করে তুলেছে।

মাসে লাইস লুরির আঙালুরী পিদিরী - কাকলীহানরে চেতকরে আটেয়া থৈরী। খেলমাটির তেনুয়ালাঙর ব্লাউসহান উরেছে - পাতলা ইনাফিহানে মুঙবারা গুরিয়া পিঠিয়েদে লাময়া পড়েছে। গারিগর রঙহান লেহাউগর মাচু। তেইর উরেছে ব্লাউসউহান আঙালুরিহান পেয়া না ফৌয়েছেগা - উহানেতে পেটগর খানি আহান অংশ দোয়া অয়া থার। ও অংশ উহানী আটিষ্ট গিরীগিথানীরাং মাচু শিক্ষারকা নিয়াম লোভ করানির মত ফামহান - আরাক আক্‌তারাও কিস্তমান জবর যন্ত্রনার ফামহান। বিশেষ করিয়া আখিটে বারো কারেম সাক্তি জন উতা, পাণির কাটা অয়া বয়া থাইতারা; সেপ পেইলেই থক আখিগী বুলেয়া চেয়তারা। না দেখিয়া থানারৌ উপায় নেই - জিঙদরে চেয়া থানাউ কিহান ? আশ্ব সন্মান বুলিয়া হাবিরতাউ খানি আকচুটিতে আছে নাই।

বাসকুলীউগর দেহগো হাবি মৌয়ে মাতুমে ঢেফা, দেছে, উহানেতে তেইরে পাকরাণীরকা মানুহান মাহেই দলে দলে চঞ্চরা পারাদেনার মাটিক দিগবিদিগ্ শূণ্য অয়া আটেতে হারনাপেইতারা। কত মানু খানা পিনা বেলাছি, কত মানু কলে মৈস গুরু হুকেইতে হারনাপাছি। তেইর লগে ডাকুলা খলপাংপা হাবিতাউ আছি। কিস্তমান লগে আগ আহেছে উগরে হাবিয়ে আপাং অয়া চেইতারা। নুমপাং সাম্পাং অয়া য়ারী হনতারা। লগর জন উগর আতহানাত ঘড়িগো - আখিগীত চশমা হান। বেশ তারু তারু গারিগো। মানুহান হাবি তার যারীলো মুরর ঘাম জাঙে অর অর বেলতারা।

- 'এগ কীসাদেগো - '

- 'বেয়কগৌ নাগৈ - হেয়কগৌ নাগৈ - '

- 'হানতে কীসাদেগো - '

- 'রাহলী বুলতে রাহলীগৌ নাগৈ। কিয়াবুলে তেইর চাহা

রাধের বারো খানি দানি তালাবী করের - দরকার অইলে সুটকেইসৌ বহের - '

- 'হানতে কীসাদেগো অইলতা - '

- 'হাবি ধন পয়সাউ তার আতে থৈরী - '

এতা ভাবনালো, কথালো মালঠেপগর চারিয় ফালুয়েদে মানুহান মাহেই খবিলালটুমহান রহিতারা পারা।

বাসকুলী উগর এলা নিয়াম নুংসি। কতদিনর ভিতরেই হাবি হাদিগী খুরিয়া হাপ দিয়া নিলগা। তেইরে এলা দেওয়ানিরকা মাণবে মাণবে আলোচনা চলিল। উতারমা জবর অয়া খটতারাতায় - পয়লা নম্বরে - ময়লক মরিয়া কত বছর বিয়া নাকরিয়া আছি য়ারী মুনী। দ্বিতীয়ে - বাপক মরিয়া নুয়া সম্পত্তি পাছি কলা পকনা আওরী গা পুরা, তৃতীয় - বিয়া করানি মনেয়া ঝেপে কুষ্ঠী বরোয়া আটতারা অথচ বাপক লকেইয়ে এ দুঃখ এহান হার নাপেইতারা। এ পারেঙর হুকাছি জিপুত। এতিন পারেঙর মানু একপন অয়া চান্দা উঠেইতারা। অবস্থা এহান দেখিয়া দেশর কর্ম্মীয়ে বৃকে আত দিয়া মাংতারা।

- 'আঃ, সমাজরকা যদিশৈ এসাদে খাটে দিলা অইসতাউ - '

তেই কিস্তমান কোন আগর লগে নিয়ম না টটরেইরী। হাবি সময়ত আপাংপী ভাব অংকেইচুটি দেখুয়েইরী। কাকালীহানাত আতহান থয়া দেহগরে ভঙ্গী করিয়া গারগো খানি হৈরাপ কাতিরা করিয়া - কেঙাডুলীগ কামর দিয়া - চেইতে সিকিমাত্রা মুজ্জীশৌ আহানী দিরী। কতগো মানু উহানী চেইয়াও আপাং। মাহী মস্ত করিয়া ঘরে বন দিয়া থইতারা ভূত প্রেতর ডেকী লড়া চড়া বন অয়া থাইতারা। কতগো আহান কিস্তমান কথা টটরানীরকা দরফর ধুলিরচেঙ উটতারা। খামতলর উতায় টটরাণী মনেইতারা অথচ সেপ নাপেইতারা সেপর কাম সেপে করতে নাপাহরতারা। এহান হবা ঐল বুলেই দলহঙরগী অয়া উরেছে আঙেই হানাত সেপটিপিনলো তাংখা লামকরেদিতারা।

তেইর লগর গীরক উগৈ পিদের চশমা উহানর পাওয়ার অইলতাই জিরো। তার পদ ফামউ উসাদে জিরো। তোপ আহানাত তেইর হর্তাকর্ভাগো, দরকার বোধে চকিদারগো প্রায় দিবছর তেইর লগে লগে বুলে বুলে এপ্রেনটিশ খাটের সুয়াই। পদফাম লেপ নাছে। দ্বিবছর আগর য়ারীহান। তেই পয়লা আশ্ব প্রকাশ করল হাকতাকহান। মানুহান হাবি আচানক অছিল। তেইর নারগত এলার সুরে, নাছার তালে। কমলপুরর মালঠেপগং তেই নিজে রচিয়া এলা দিল। কমলপুরর উদিন না পাহরাণির মত দিনহান অছিল। ভক্ত মণ্ডলীরে আহির পানিলো জলে নালে করেছিলি বারো গাপুরার বুকগীত শক্তিশেল বেলাছিলি। আরাক জন আগর বুকগত

শক্তিশেলগো এমনভাবে দাবিয়া পড়িল যে বিশল্যকরণী ছাড়া তার উপায় নেয়ছিল। মুণ্ডেই বিশল্যকরণী স্বরূপা বাসকউলী গিথানকরে দেখল। ঘর-দুবার, সায়-সম্পত্তি পুংখাত উরাবেলেয়া তেইর পিছ ধরল। ঘরে তারতা কুনগৌ নেই। দীলগো ডালিয়া বানা পাছিল তার দীলজান মইলক তিন বছর আগে তারে বেলেয়া অগন্ত্য যাত্রা করেছে। বিয়া করানীত আর মন নেয়ছিল তার। উদাসীন অয়া বুলের অখচ ধন-যৌবন দ্বিয়হানিউ তার পুরাপুরি। হুতোমে মাতে গেলগো, বাসকউলী উগর রূপর মোহে পড়েছে কিনা মাতানি চিল। সঙ্গী নেই আকখুলা জীবন এহান তারাং ওয়াই-চিলয়া পড়েছিল। কীর্তনব এলার রসে, ভাবে তা প্রায় বিভূলা অসিল। এলার মাহাকে জীবনহানর হারৌপা মিঙাল আহান দেখলো - হাতে হাতে তেইর পিছ ধরতে হাংকৈ নাইল।

মানু এগরকা বাসকুলী গিথানক নিয়াম খালকরিরি। তার চরিতে বারো কথায় কোনদিন হবানেই বারা আহান নাপাছে। ধীর গন্তীর মেইথংহান। কাম করের নীরত অয়া। মানুর নিন্দা প্রশংসাত তার লক্ষ্য নেই। কিহান মনেয়া তেইর লগে লগে বুলের এহান তেই উপনুয়ারি। তেইর হুদিগো হাতে হাতে দোলা দেনা অকরলো। উন্টা তেই তার খানা পিনা আনা-যানার বারাদে নজর দেনা অকরলী। দিনর পর দিন লালয়া যারগা - হুদিগৌ খানি খানি গলে গেলগা - হাতে হাতে সাদহবা জ্বলেইর লগে টটরা বকবক থিংকরে দিলো। হজকে নাধরের নুয়ারাহানলো তেই উন্টা ভোগানীত পড়লি। মহাবিভ্রাট আহানাত খালকবিরী।

তেইর জনমহান আরাকৌ আচরিত। জীবনে আকখরুম ঘর পাতিয়া চাছিল জীবনহানরে ভোগ করানীরকা। তেইর আশাহান কিন্তুমান থুং নাইল। হাবিতাত হু দেখল। তেই অনা চেইরী মুক্ত পাহীয়াগো - হেয়কে চার বন্ধনময়ী অরিঙীগ করে। এলাত তেইর নেশা - জনমকার নিশা। এলার মাহাকেই তেইরপাচগো ঠৈ। হেয়ক কিন্তুমান তেইর পুরা বিপরীত চলিল - সমাজর এলা, নাছার ব্যাপারে তেইরে কোনতা অধিকার নাটল। ওয়াই চিলয়ল তেইর জনমহান। সংসারে মন না বহিল। বাধহান ছিড়ানীরকা দরফর করানী অকরলো। আকদিন রাতি নঙেই নুকুলিয়া আইলি। সংসারর বন্ধনজাল পুরাপুরি ছিড়ে বেলা। হবা ওঝা আগর আশ্রয়ে এলাত মন দিলো। ভগবান তেইর নারগত কোনতা কৃপণতা নাকরেছে। শিক্ষা লয়করাণীর পিছেই তেইর নাঙহান ইলেই লেয়য়া দেশে দেশে ঝংকার অইল। যতই এলাদিরি ততই নাঙহান ফুটানী অকরলো।

অনেকদিন বিদেশে থায়া দেশে আলয়া যানারকা সা লৈলী। বদরপুর রেল জংশনে সেকা অয়া গেলগা। হীনে আকয়া লগর গীরক উগর ঘুম আহানী অকরলো। বাসকউলী গিথানক নীরত ফাম আহান চেয়া ফামহান সালকরে দিলো। লগে লগে ঘুমে অচেতন অয়া পড়িল। তেই তার কাদাত বয়া থাইলি। জিংদরো তার মেইথং

উহান চেইরী। ইলেকট্রিক বাতিগর মিঙালে তার মেইথংহান মেয়েক শেঙয়া উঠেছে। আখিগী জিপেয়া নিরুপায় সরল শৌগর ডেকী ঘুমর রাজ্যত বিভূলা। তার মেইথংউহান চেয়া তেই খালকরিরী। মন প্রাণ প্রায় তারাং সপিয়া দেখু - হুদা কাতকরানীহান বাকী। জীবনর পথগো কুংগো - কীহান জনমর উদ্দেশ্যহান কোরাং থাগেলগা উমরকার শান্তি। হুদা খালকরিরী - খালকরিরী। ঘর পাতলে বারো জঞ্জালে পড়তো। চিন্তার আর বিরাম নেই।

খাংখা তেইর চিন্তার হোতগো আলথক দিলো। তেইর আখির মুণ্ডে-ভাহিয়া উঠিল, ভাবুক বৈষ্ণব সাধু সন্তর করুনায় বুঝেছে মেইথংউতা। তেইর এলায় মুক্ত অয়া তেইরে কত আশীর্বাদ করলা - কত আদর করলা। মানুর জীবনর দুর্ভব বস্তু সন্মান বারো আশীর্বাদ তেই রাশি রাশি পাজিরিগা। তেই কতি ভাগ্যবতীগো! এক ঈশ্বরর কৃপা থায়া তেই পেইরিতা। কিন্তুমান হাবিতার মূলে আছে তাই তেইর ভগবানে দেছে নারউগ। উনার উগর গুণেই তেই দুর্ভব সন্মানর অধিকারিণী। আহা কীর্তনে কতি ভাব, কতি রস, কতি হারৌ। তেই আখির পানি আর ভর ধবে নুয়ারলো। তেইর সার্থক জনম এহানর তেই আজি প্রত্যক্ষ উপ পড়লি। না না - আর সংসার জ্বালায় পড়ানির দরকার নেয়ছে।

ত্রিপুরাত যানার উদ্দেশ্যল সালসেগো। কিন্তুমান আর দেশে যিতেগা মনহান নাকরলো। লগর হাবিরে আসাম লাইনর গাড়ীহানাত টিকেট করিয়া কাকরে দিলো। হাতে হাতে গুমজেছে উগর কাদাত আয়া কুপ করে মেইথং উহান চেয়া নিলগা। দশ টাকার নোট দুহান ঝেপগত থদিলো লগে চিঠি ছৌ আহান। তারে বেলাদিয়া তেই গাড়ীহানাত কাইলি। নিয়াম সময় নাগেলগা গাড়ীহানর বাশীগো হাকমাটি কাপেয়া উঠিল। গাড়ীহান প্লেটফর্ম এরাদিয়া লামডিং মুখা সালিল।

আধা ঘণ্টা পিছে ঘুমেত্ব হজাক অয়া বিড়ি আগ নিকালানিরকা ঝেপগত আতহান বরেইলো। বিড়িগোর লগে দশ টাকার নোট আহান, আপাং অয়া বারো ঝেপগত আতহান বরেইতে আরাক নোট আহান, লগে আরাকৌ চেটুমা আহান। পাকড়িয়া চার মরেলো আর হীন নাপেইস মর সন্ধানে কানা নাইতে আকুরিহান রূপা ঝেপ গত থদিলু। উতালো ঘরে জিসগা। ইতি - বাসক উলি।

চিঠিহান পাকরাণীর লগে লগে আখিত জিনজিনি বারো থতাত সেলাই পড়িল। মুরগো উং উং বুলানি অকরলো।

কিন্তুমান লাভতে নেই -

লাভর মাঝে একমাত্র আকুরিহান রূপা - মাত্র দ্বিবছব তেজারতির ধন।

(পুনঃ প্রকাশ)

চন্দর কইনা

বিভূতি ভূষণ সিংহ

আষাঢ় বেলীটিক। উতার গজে খরা। মানুগ দ্বিকরত করিয়া রৈদে ছড়া দিলে কড় কড়ি ছকেইতৈ। বার বাজি পেইয়া আল ধরিয়া রৈদ হানে জারে নুয়ারিয়া রাস বিহারী আল এড়াদিয়া, জাং আত ধৈয়া চৌধুরী মহাজনর ঘরর মালদৈ হেইনৌ বারীর তলে ছেয়াগৎ চিকৈয়া বহেছে। গাছ বারে, মজা মালদৈ আগ দেহিয়া হিল আগ উড়া দিয়া ছিড়িয়া খেইঙ বুলতে গাঙর শৌ আট নয়গ আহান মোরেউ আগ, মোরেউ আগ' বুলিয়া তারে বেড়ি দিয়া বেল্লা।

- গাঙ এহান আর নাইল ! এবেদেতে টুপীগৎ বড়েইল চউলগী নেই, জরম দিয়া নেছিগা শৌ কুচতে। ইস্কুলে না গিয়া বেলীটিক এহানাৎ হেইনৌ খানাৎ আহেছি। ভিক্ষা মাগতারাই সোয়াই, আরতে কিতা' রাস বিহারীয়ে ছৌয়েয়া গুজুরের। খানি পিছে নিজর কনাক কালহান নিংশিঙ ঐল পাউরী, কঙালা ঐয়া মাতলো -

- বৈ, বৈ। ছেয়াগদে বৈ। মি হেইনৌ ছিড়ে দিঙ। বুলিয়া গাছ বারীরত কয়া ডেল আগ ধরিয়া বাকারা আহান দিলতাই হেইনৌ দশ বারগ, ঢপ ঢপ করে মাটীহানাৎ পড়িল। শৌয়ে ঔগী ল কুরিয়া যার যার আকেইগীলো বৈলা। রাসবিহারীর কা দুগ আহান আত হানাৎ ধরিয়া থৈলা।

রাসবিহারী অতি মেধারী ছাত্রগ আছিল। বুদ্ধিয়ো উসাদে চৌখাৎ অছিল। আহির পট মারতে মারতে বুদ্ধি নিকালল। কথার লগে কথা জোড়া দিতে তার জুড়ি নেয়ছিল। আকৈয়া তারে 'কথা-সাগর, রাসবিহারী বিরাশী বুদ্ধি বুললা। কিন্তু গাঙর বুজন, ইমা-ইন্দল, বুড়াবুড়ি লাংকরতে, লাকনা দিতে, পাঠশালাগ লৈকরে নুইলো। রাস-বিহারী আহিল বুললেই কিহান আহানতে ঘটতৈ, এহানে কান হিঙারেইয়া আহি হুঁচিয়ার ঐয়া থাইলা। কিন্তু আল্লী পেয়াউ তারে আল্লীপানা নুইলা। সময়ে সময়ে তা জবর কানাৎ আহেছিল - হৈপৎ পড়লে মেইপা ডাহানি ঐলে, নেই বার আহান যোগাড় করাণি ঐলে, অসময়ে কোন আকবেদে যানা ঐলে, রাসবিহারী, হাবিরতাউ লাগের। উতার গজে রাসবিহারীর অতি ডাঙর গুণ আহান আছিল - খুমিং কাকরিয়া মন মজেয়া যারী দেনা। রাসবিহারীয়ে যারী অকরল বুললে শৌ ইস্কুল ডিলেলা বৌয়েইর লেইরাঙে ভাত ডহিল, নাইলে লেইরাঙর জ্বি নিভিল, বাজারর মানু পথে সেন্দা ঐলা, লপুকের মানু ভক্ পাছরলা, দুরেইর যাত্রী হীন পাছরীয়া আটলা। হাবিস্ত ডাঙর গুণ আহান তারতা - নাইতৈ, নুয়ারতৌ, নাইল, কথা এতা তার থতাত না হনেছি। তারে 'মুশকিল, আসান' বুললা। চিন-জান, বৌ নেই মিয়াঙ - তেইহৌ বৌ নেই, পিওন, কেরানী, অফিসার বৌ নেই, নেতা-মন্ত্রী, বাচ নেই, হাবির তুলো সমান ঐয়া বকুবকা পারল। হাবিরে যারীলো মজা পারল।

উহানে গালী খেইয়াউ শৌ যারী হানীর কা বৈয়া থাইলা।

তানু হবাক হারপাছি - রাসবিহারী খুড়ায় গালেইতৈ হায় কিন্তু কোন আহান মাগলে কোনদিনো না ফিরার। রাসবিহারী হেইনৌ বারীত লামিয়া আনার লগে লগে শৌয়ে বেড়িয়া ধরলা - খুরা, যারী আহান দে, আজি ইস্কুল বন্দগতে। বিশ্ব হিন্দু পরিষদে 'আসাম বন্ধ ডাহেছি।

রাসবিহারীয়ে যারীহান অকরল - গেইয়া বাপুর বল্ডা ভাগী থনার যারী হনেছ। জোনাক রাতি পথর ঘাতর পানী, হুকানা হান বুলিয়া পারা দিয়া গুলামজামর আতজাঙ ভাগানির যারী হনেছ, পূর্ণিমার জোনাকে ছনর খলাহান ধুবুরী বিলগ বুলিয়া রাখা মোহনে নৌ বেইতে হনেছ, উলার ডাইলে খাজিং আকগ বারে বারে গজ তল করতে খা বেলেইয়া বুঙ্কা মামায় এতাহাবি খাজিং কুরাং গেল্গা বুলিয়া জিলক নুমিলেইরে গুজুরতে হনেছ, বরাকর পারে ডুলবীর গজে মাঙ বেলেইয়া ডুলবীগ আটিয়া বিতেগা তার আমাংপা আটিয়া যারগা দেহিয়া রাতি ঘর ভিতরে মাঙ বেলেইয়া মৈলকর গালি খেইয়া ঘর বেলেইয়া নিকুলেছিল মাঙকারার যারী হান হনেছ, কিন্তু ধমসিং অজার জেলাগ দাব দুয়াছিল যারী হানতে না হনেছ নাই। আজি ঔ যারী হান দিঙ -

- ধমসিং অজার মৈলক নংশাঙ ঐল মরেছিলী। আমি উবাকা পাঠশালা পাকরলাং। মৈলক মইলী হানতে ধম সিং অজা হিনপার। হিনেইল - তপ্তা পানী, ফুতিফালী ধনা, বিয়ানকার ভাতপানী, সেন্দাকার জাং আত ধনার পানী, এতা আকখুলী বহক আগয় নাতি-নাতলর স্নেমছ করতে সিজিল করাণি হিন পেইরী, হানতে সেবা শুশ্রষারকা জেলাগ তারতা বিয়া করাণি লাগের। বহুদিন ঐল বরাচাউবা মামা, গোসাই ইপু, গোলোকাচান খুড়া এতারে মাতেছিল। কিন্তু কোনগয়ো যোগাড় করে দিয়া নুয়ারেছি। বুড়াগ হিন পেয়া থার।

আকদিন বিয়ানে মি ধমসিং অজার উঠানে গিয়া ডাকলুগা - ইপু ঘরে আছং তা - 'হাই আছু' বুলিয়া নিকুলিয়া আইতে আচালার তলে লাঠিগ গুড়িয়া ঝাপুনীহানলো মাংকলে আইয়া উবা ঐল। মোরেতে তা দেখলেই আহির রম, করিয়া বেলেইঙ বুল্ল। কাদাৎ পেইলেতে হরিং নেই। মুলি বাহার গুড়ির রুপালো বাঁধাছে লাঠিগল বারানিত আহের, নাইলে মুঙে মুরা পেইলে মুরা, উতুপ, পেইলে উতুপ যেতা পেইব আহানলো মারিং বুলিয়া উরা দেব। হান্তে মিয়ৌ হুচিয়ার ঐয়া থাউরী। - অ, ইপুতে বারানিরকা লাঠিগল যুগৎ ঐয়া আইলেতা, উতা ঐলে মি যাউরীগা, বুলিয়া বুলন্ দিয়া যানার সটন্ দিয়া মাতলু - বরা চাউবা মামায় জরুরী পৌ আহান বাগা দিচ্গা বুলিয়া মাতল আর আহেছিলুতা - মি যাউরীগা - বুলিয়া কাকেই আহান কারলু। মি হারপাউরী, আজিতা মোরে না গালেতৈ, না বাড়েইতৈ। বরাচাউবা মামায় দেছে পৌহান হানী মনেইতৈ - উহানে চালাকী করিয়া বরা চাউবা মামায় দেছে পৌ বুলিয়া মাতলু।

নুয়ারাগরাং মোর বেললু হজক ঠাক্‌হান খটক খাটিল - এ বাবারে।
আয়, আয়, না যেইগা। বরা চাউবার কি হান পৌ ছনিং। এরে চা
লাঠিগ বেললু - বুলিয়া জাপুনী হানার তলেস্ত লাঠি নিকালেইয়া
বেরর, কাদাং গা করল। মি মাতলু, না দুরেইক বেলা। নাইলে মি
যাউরীগা।

- হে, সেতা, সেতা, সেতা, তিন সেতা করলু, কিস্তাউ
নাকরতৌ। এড়ে লাঠিগ দুরেইক বেললু - বুলিয়া মাংকলর কোনগদে
উড়া দিয়া বেলল। মি হারপাছু, পৌ এহান ছানীর কা তা বহুদিনেস্ত
ভকে টাটীয়ে আছগ। আজি মি যেহান মাততৌ, উহান করতৌ।
যেহান মাগতৌ উহান দিতৌ। আজি তা মেনাগ ঐতৌ। মি মাংকলে
কাইয়া তার কাদাং গেলুগা। মোরে খৌরাং ঐয়া আহিগী পিট পিট
করিয়া চার। মাতলু - বরা চাউবা মামায় মুনালর জিলকরে ঠিক করে
দিল। আজি পূর্ণিমা অছে। আজিয়েই রাতি নেনা লাগতৌ। বিয়াতে
নাকরতার দাবদুয়ানি লাগতৌ। ইপুয়ে পারতেইতা না কিতা
আঙকরিয়া মোরে তারাং গিয়া বাগানিরকা মাতলো।

কথাহানি মাতিয়া মি তার ইরাঙ চেইয়া থাইলু। দাবদুয়ানী
বুলতে তার মেইথংহান খানি মৈটা মৈটা ঐল। বুড়া অছে গ নাই।
জেলা আগ খকে তুলিয়া দাবদানী কমর ডাঙর যারী হান নাইগে। তা
আঙকরল -

- কইনাগ চেইতে কিমে ? সাদ-বাদ কিসাদে ? হু হারকাং
না ডাঙর দীঘল। তি দেখলেতা ? ধলাগ না কালাগ ? তার খৌরাং
হান আরতাউ জবর করানি মনেইয়া মি মাতলু -

- কইনা গ ধলা। চেপ্টাচিরি, ডাঙর দীঘল। ডেপ্ ডেপ্
করিরী। বলী অছে, ইমে বয়স খানি যাম - পচিশ ছাবিশ ঐতৌ। বিয়া
নাছে। ইমে ইপুরাং বুলতে যাকরলাতা। নাইলে কত ফাম হমাছিল।
বাপকে তোর কথাছানীয়ে অন্য যারী বেলল। এবাকা ইপুয়ে কি
হান মাতর। ধমসিঙে মাতল -

- মাতিলতা কিতা আছে। আনতৌ কুংদিনতে আনানী
বুলিয়া আঙকরলে মি মাতলু -

- কুংদিন কিতা নাইগে। আজি রাতি ১০ বাজিৎ বুলল। বরা
চাইবা মামায় আকসাটে পাঞ্জি কিতা চেয়া মাতেছে বুলিয়া মি মাতলু
- আজি বসন্ত পূর্ণিমা। রাতি দশটাং লগ্ন, শুভ মুহূর্ত আছে। ইমে
ঔবাকা আনানী লাগতৌ। কইনাগ দশ বাজিৎ তানুর ঘরর পিঠির
লপুকে নিকুলিয়া থাইতৌ। ইপুয়ে রাতি নয় বাজিৎ সালয়া থাইছ। নয়
বাজিৎ মি আইয়া ইপুরে নিয়া যিতৌগা।

ধমসিং অজা হারৌ হানে কিতা করত না করত খালকরিয়া
না পার মাতলো - এ, ঘরে ভিতরে কুংগ আছতা। এরে নাতিয়ক
এগরে চাহা খেরী আহান দেই। বাবা ! মৌ আহান নিতেগা। আজি
মোরে জনমকার উপকার আহান করলে। পুষ্টি পালৈয়া থাইছক।

ইমেতে বুড়া এগ পুখুরীগং ঝুপ্প দিয়া টুপক হিনৈয়া সটক
নাম্‌ছা পিদিয়া ঝটক দৌ হমাদিয়া বিয়ানকার কামহান লমকরের।
আজিতে খের পুড়িয়া খার ছাকিয়া ছেপতর লুরালো তাক্ করিয়া
হিনেইল। লেইশাঙে বৈয়া গাবথিলকরে গারীগ বুজে নাম্‌ছা

পিদলো। গায়ত্রী সল্ করল দৌর পুজাহান ফুল-তুলসীলো তাপ্‌থা
ঐয়া কৈল। বিয়ানকার খানা হান্ খেইয়া হজক আক্‌কারি পিতে
পিতে ঘুমছৌ আহান দিল। পরকার ভাত কিতা খেইয়া মাদানকার
ঘুমহানৌ থেক্ থেক্ করে দিল। সেন্দার আগে উঠিয়া হাত-জাং
সেঁঙিয়া আফিক ক্রিয়া লৈকরিয়া, ডাকবারেইতে দহিনাং দেখিলা,
নুয়া ফেইচম আহান মালকোচা দিয়া পিদলো, লাং খাতর তুপ্
আহানলো খোয়াং বাঁধলো, ঝারর পড়হান হানতে গাডুয়া মকার
আচালা আহান উড়ল। ডাকুলার কৈয়েং আহানৌ মুরগং করিয়া
হাজিয়া থাইল। খানি থাইয়া উঠানে আক খুক্রম, ঘর ভিতরে
আকখুরম, আলথক্ নালথক্ করিয়া থাইল। সময় এহান এমাটিক
তাপ্‌ তাপপ যারগা হাঙে আপপানে ঠুকরিয়া ভিতরে ভিতরে উমা
হিজা করে। উহানে বহকে যেই আঙকরল - বাবা কুনো কর্ম জর্মত
যারগা থাং ফুতি ফালি পিদিয়া সালৈলেতা। ধম অজা জিগ ঐয়া
ছৌও পড়িলগা, আকদিন হবা ফুতি ফালি পিদিয়া না করে। তা।
আকদিন রাতি বুললুগাউ বাল। তোর গারীগ দুহেইলেতা !

বহকগ গালিখেইয়া থুতুতু অপড়লিগা। থতাহান জিপেইয়া
ইরাইরি ঘরে হমা পড়লিগা। আর না টটরলি। টটরলে কিবা জানি
কততা মাতে। বুড়া উগ ইমেউ থতাহান কাম। বারো ছৌয়েলে
লাঠিগল উড়া আহান দিতেউ পারে। বহকগ হান্‌তে হৌরকর
চাঙহান হারপেইরী।

রাতি নয় বাজিত রাসবিহারী আয়া ডাকল - ইপু !
সালৈলেতা ! জিগ্‌গা বেনাই। রাসবিহারীর নারগ ছানী ফাং নেই
বুড়াগ স্প্রিংগাছর ডেকি ফল্‌ ফালদিয়া উঠানে নিকুলিয়া মাতলো
- হাংকাস্ত সালৈয়া আছ। হাট যিগ্‌গা - বুলিয়া রাস বিহারীর পিঠি
পিঠি আটানি অকল। লাঠিগ নাইলে না আটের বুড়াগ, লাঠি নানিয়া
যারগাহান দেহিয়া বহকে লাঠিগ আতেলৈয়া উঠানে নিকুলিয়া ডাহিয়া
মাতলো - বাবা ! বাবা ! লাঠিগ পাছরিয়া বেলইয়া গেলেগা। এরে
লাঠিগ নিয়া যাগা। কথাহান কানে যানার লগে লগে বুড়া উগ খৌয়ে
মকছিয়ে জুলিয়া উঠিল - ঘেঙিতকর জিলক, শুভ কাম আহানাং
যিতেগা পিঠিয়েদে ডাহিরীতা। তোরেতে লাঠিগর তুল বিয়া দিয়া
আনেছিলুতা। মোর পুতক এগ বরর পীরাহানাং লাঠিগল
বহেছিলতা। কিস্তাউ হার-বৌ না পেয়া, যেহানাটৌ যুয়োরীতা,
লাঠিগল যিগ্‌গা, কইনাগ লাঠি দেহিয়াই না দাবদিতৌতা ! মোর
হবাহান্‌তে তোমারতা আহির বিষ নাই ! বুলিয়া বুড়াগ রাস বিহারীর
তুলো নিকুলিয়া গেলেগা।

বহকে যেতা হারপানির হার পেইলী। বুড়া এগ সাজেল
করিয়া কইনা আগ আনাং যারগা এহান ধৈরাপে ধরিয়া ভিতরে
ভিতরে থু থু করে আহিয়া ঘরেদে হমেইলিগা। খালকরলী, রাতি
রাস বিহারীর তুলো যারগা হান্‌তে ইমে এসাদে আহান্‌তে ঐতৌ।

পূর্ণিমার জোনাকহান ফট ফট করেছে। অজায় মিয়ে মুনালর
ঘরর পিঠিত লপুকগং উবা ঐলাংগা। ই এন ডির বাঁধগর গজেস্ত
জেলা আগ লামিয়া আইয়া আমার কাদাং উবা ঐলী। ফুলর
তলফুতি আহান পিদেছে, রাঙা আতভরা আঙি আহানর গজে

আন্দুকা ইনাফী হান মুরগ ঝাপদিয়া উড়েছে।

বুড়া এগ বাছা কাছা নুইল। আকফালে কাদাং গিয়া জেলা উগর আতহান পপপ ধরে বেলল। মাতের - কইনাগ ইনাফীহান খানি ছেচা, মেইথংহান চেইঙ। জেলাউগ লাজ পেইল সটন দিয়া উঃ আঃ করিয়া ইনাফীহান ছেচানী নাকরিরী। মি কাদাং গিয়া মাতলু - ইপু! এপেই ডিল নাকরি। থকক পিঠিহানাং কাকরিয়া ঘরে নিয়া বেলাগা। ঘরে চেইতেই নাই। এপেই ডিলেলে, মানু আগ দুগয় দেহে বেললে গাঙর মানু বাগা দিয়া বেললে - গাঙহান ফুকৈয়া মানু আহে পড়ইতাইগা। পিছে দাবদিয়া কুল না পেইতাঙাই। পিঠিহান পাত - বুলিয়া কইনাগরে মাতলো - হে কইনাগ থকক পিঠিহানাং কা।

ধমসিং অজা দাবদানী অকরল। পয়লা কতহান আচুলে দাবদিলো। পিছে তাইপল। চল্লিশ পইতাল্লিশ নল পারা গিয়া আর নুইল। উবা ঐল। ঠুকরিয়া ফ ফ করিয়া নিংস্বাহান কারের যেমন বেল গাড়ীর ইঞ্জিনগ ফুস ফুস রহের পারা। কইনাগরে মাতল - কইনাগ খানি লাম বেনাই। মি খানি দোয়াত্ত আহিংগা। কইনাগ লামানি না করিরী - ডর পাউরী বুলিরী। এপেই লামলে মোরে ধরে বল তাই। কিলেইতাই। আরাক খানি গিয়া পড়িকগা। ধমসিংর আর খানিগ্লাউ বৈয়া নেনার শক্তি নেই। কাঁদিল মাটিক ঐয়া মাংল - খানিকক লাম। মি আটকা নুয়ারতৌ। ফুতিহান তিঙতৈ। হুনিয়া মোরতা বানা আহান পঁকেল আহিগীল কৈনাগরে ইসারা করলুতায়, খকহানাত লামলি।

দীঘল করে নিংস্বা আহান বেলেইয়া ধমসিঙে মাতলো - উঃ পিঠি এহান ডেব্দে পড়িলগা। আরাক খানি সময় থাইলে, আকসাটে কাকালীর জরা খুলে পড়িলগা ঐচ - বুলিয়া খানি দুরেইং লহি করাত বহিলগা। কইনা গরেউ লাজ পার। হাজার ঐলেউ নুয়া কইনাগ নাই। লহি করিয়া আইয়া মোরে মাতের দেনে কইনাগরে মাত, হাতে হাতে আটে আটে থিকগা। এবাকা গাঙহানাত বহু দুরেই আইলাঙ নাই। আমার ঘরর মুঙহান পেইলাঙহা - কিরৌ ভরি হান। জেলেইয়ে এমটীক ভরি ঐতাই এহান না খাল করেছিল। মুহীয়ে এমটীক ভরি না থাইব।

মি মাতলু - ইপুয়ে নাই করলে তা, ডাঙর দীঘল, বলী পাংকাল ডেপ ডেপ করিরী জেলা আগ মাতলে হানঙে বরাচাউবা মামায় মুনালা জিলকরে ঠিক করে দিলতা। নাইলে, এড়ি, বেরী আগ ঐলে, পাতালা-যাতালা ঐয়া নুঙেইক খকরিয়া নিলেগা ঐচ্ছ।

ধমসিং অজায় মাতের - এ, এড়ি, বেরী! মানুয়ে তাঙ করিয়া বেলাছিতা। আল্লী পাউরী। খানি ভরি ঐয়াউ থাক। পকে-জকে নাছি কাছি নদন এতায় বালা - বুলিয়া আলিগং বৈয়া খানি জিরাণিরকা করতে, মি বারো থৌ করলু - ইপু! এবাকা না জিরেই। মাতে পারিল কথা নাগে। হয়ত মুনালা জিপুত বনকরে ঘরে না পেইয়া বিছাড়াইত নিকুলে থাইবা। এপেইত পা বেললে, কইনাগ কারলৈয়া নিতাইগা। আমারেউ দুহনি দুকতে পারে। বেয়ক দিয়োগীতে ভীমগী পারা। হিনে দুকে গিয়া পড়িকগা। খকহানাত কাকরে বেলা। আর কতিহান থাঙ বুলিয়া মি সাহস বরা দিলু।

ধমসিঙে কথাহান ইলৈয়া কইনাগরে ডাহিয়া মাতল - হে কইনাগ। আয় পিঠিহানাং কা পড়গা।

কইনাগয় করিঙ বুলিয়া ফল্ল ফালদিয়া পিঠিহানাং কা পড়িলগা।

- উঃ মইলুয়ে। মুনিগয় মোর কাঁকালিহান ভাগে দিল - বুলিয়া কেঁকেইয়া ঢপক মাটীহানাং বহে পড়িলগা। বৈয়া মোরে ডাহিয়া মাতের - অ, রাজবিহারী এগতেনা পুতানা হিনচাপীগ আছে। মোরে মারিঙ বুলিয়া করিরী। মি আর এগরে থকরে নুয়ারতৌ। তি বৈয়া নেগা। মি উবা অ নুয়ারলু। লাঠিগউ নানে বেললু এবাকা কিহান ঐলুতা। বহকগয় হারপেইয়া লাঠিগ নেনার কা মাতেছিলী। অ, মোর হনার বহকগ। আপ্পানে গালহেলুতা। এবাকা কিসাদে যিতৌগা। তার বিলাপ হুনিয়া মোরতা খেতৌ ছিড়িয়া আহানি আহিল। দাঁত কামাড়েইয়া আহানিহান কোন মতে আটকেইয়া থাইলু। কইনাগয় থু - থু, থু-থু, করিয়া আহিরী। মি ইসারালো তেইরে আহানীহান বন্ধ করানিকা ইঙ্গীত করলু। বুড়াগয় ছৌয়েয়া মাতের - কি লাজনেই জেলাগ। কাঁকালীহান ভাগে দিয়া বারো থু-থু, আহিরী। না, এগয় হুতুমেউ আজি মোরে খেইতৈ। এগরে আল করে দেগা। মোরতা কইনা না লাগের। উঃ বাবারে-বুলিয়া কাঁকালিহান টিং দিয়া, আত দিয়ো হানিলো জাতেইয়া মাঠিয়ার। মি তেমজাউরী -

- ইপু! না পেইতে নাপেইতে আজি তিন চারি বছরর মুরে বরাচাউবা মামায় কতত কল করিয়া এ কইনাগ ঠিক করে দিলতা। এবাকা খানিগ্লারা হিনপেইলে বুলিয়া কইনাগ আলকরে দিলে আর পেইতেইতা। উতার গজে কইনাগ এবাকা ঘরে আলকরলে আর তেইরে ঘরে বড়েইতা যে হিনচাপা মার্কী বেইবুনীহান। কইনাগরেতে বারেইয়া চেপ্টা করতাই করতাই, কালি বিয়ানে তোর ঘরে গিয়াউ হাজোয়ালী করতাই। মানুর মিমাঙে এদিন হাবিকার ডাঙর অজাগ বুলিয়া কামাছিলে মান ইজ্জতো যিতৌগা, কইনাগউ না পেইতেই বার কথা এহান জাপদিয়া থাইতৈহান নাগে - বৌ-বুলনীর ডেকি পাঁচ পরগনাং সিল পড়তৈগা। হয়ত, কুমেই কাসাত বার্তন থিংকরতেউ পারে। বার্তন থিংকরতে পারে - বুলানিয়ে ধম অজা পুখাকে মরে পড়িলগা। পেটুক ধম অজা বান্দ্রা বুললে ঘরে থা নুয়ারের। ধুমা দেখলেই উবেদে বান্দ্রাখানাং যারগাগ। এবেদে গারীগং পাংকালর জরা আগ নেয়ো পড়েছেগা। বুড়াগারিগং আড়াইমনি বস্তাগ খকরিয়া দাবদিয়া জুহান আধা আত লামছে। ফ, ফ করের। কাঁকালীহানো জোড়া এড়া দেছে নিরুপায় ঐয়া আহিগী পিলিক পিলিক করিয়া মোরে রেঙ রেঙ করে চার। মোর অন্তর তার ও দৃষ্টিহানে ছেং করল। মনে মনে কায় এহানরকা নিজরে থিকার দিলু। তিনতু থতালো মাতলু -

- ইপু! তি, ইমে কুনমতে দ্বি কাকেই, আক, কাকেই দে। বাকী উহানী নিকরতে। কইনাগরে মাতলু - হে কইনাগ। তাপপ তাপপ, কা। নিংস্বা আচুলিয়া পাতল করিয়া থাইছ। ভরিহান ছুপ করে নাদি।

ধর্ম অজা উবা ঐল। পিঠিহানাত কাকরল। কাকরিয়া আক কাঙেই দিকাকেই বেলেইয়া তাপ্প তাপ্প আটেব। আতহানিল, কইনাগর আঙুলী, আত জাং পাম্পল আতা-আতা মাটিয়া মাটিয়া চার। আট দশ পারা গিয়া কইনাগর মাতলো - মোরে খানি লামাদে। মোরতা দোয়াত যানা আহের।

ধর্ম অজায় কইনাগ লামা দিয়া মাতল - উপেয় জাঙ্গালগর হৌ পারে যাগা। কইনাগ পিঠিহানাত লামিয়া খানিপ্পা গিয়া উবাঐয়া লহি করাত লাগলী। ধর্মসিং অজায় নাচেইল সটন দিয়া গাডগ বুলন দিয়া দেহিয়া ঙাকৈল - কইনা এগতে উবা ঐয়া লহি করিরা তাতে। অবাই, এহানতে কি হান। তারতা মন হানাত খটকা আহান লাগিল। ইমেউ দুনিয়াত আলাদা অছে ভরি হান। বার আত, জাঙ আঙুলী, পাম্পল এতা অছে দরা হান। উতার গজে রাসবিহারীয়ে করেছে যোগাড় হান। নিশ্চয় কিহান আহান করে থাইব। তার গারীগ জানেইল। এ মুলুক খৌরা, বিরাসী বুদ্ধি এগয় নিশ্চয় আহান করেছে। মনে মনে ঠিক করল, যদিচ কইনাগ কি হান আহান অর, আজি ঘরে নিয়া রাজবিহারী বারো মুনালা জিলক, দ্বিযোগীয়ে এমন হিকানী হিকেইতৌ জীবনে আর মোর তুল চালাকি না খেলতাই। মনে মনে এসাদে ঠিক করিয়া- অতি কাঙালা ঐয়া ডাকল : কইনাগ। লয়েলে - আইবেনাই! খকহানাত কা। ঘরে গিয় পড়িকগা। খাংতা ধর্মসিং অজার নারগ ঔনা নেই কঙালা অইল হনিয়া বারো পাংকাল নেই বুড়া গারীগ আকতা পাংকাল আহানির হিরাম উম করিয়া মি হার পা বেলু - ধর্ম সিং অজারমনে খটকা লাগিল। কইনাগর উবা ঐয়া লহি করানিহানেই হাবি কর্ম পানীছানি ঐল। এহানে মি কইনাগর গজে খানি মনে হিন পেইল। কিন্তু হুচিয়ার ঐল। কইনাগ ঘরে নানিয়াউ উপায় নেই। কিতা মাটিয়া কইনাগ আলকরত। উহান ঐলে ধরা পড়ে পড়তৌগা। হানতে পিঠি পিঠি অঙ্ক করিয়া করিয়া ছালেলু।

ধর্ম সিং অজা কইনাগরে খকহানাত কাকরল। মকার আচালা হান লো কইনাগরে তার গারীগর তুল হবাক বাঁধলো। জাং দিয়োহান তার আত দ্বিযোগী হানিলো চেং করে ধরিয়া মাতল - কইনাগ মোর ঘাড়গ চেংক ধরিছ। না পড়বেতা। মি আকদাপে ঘর ফোঁয়েতৌগা - বুলিয়া কইনাগল আকদাপে উঠানে আইয়া উবাঐলগা।

- হে বহকগ। চালাক ক থংমেই হানল আয়। লগে মোর লাঠিগউ আনিছ বুলিয়া ঠুঁয়েয়া নিংখা থেঁপেয়া মাংকলর কোনেদে চার। বিয়ানাকার লাঠিগ মাংকলর কোনগং আছে হান দেহিয়া নিশ্চিন্ত ঐল -

বহকগ লেমগল আইলী। মি খানি দুঁরেই পারা থাইলু। লাঠিগল হক্ক লাগ না পেইব করে।

পূর্ণিমার জোনাকহান উঠানহান পাহিয়া পড়েছে। বারির ফুল পাতা কিতা কাতা ইশেঙ শে দেহিয়ার। রাঙা, আন্দুকা, ধলা, তেনুয়া হাবিতা। লেম-লেনঠন বকার নেই। কইনাগ আহি জিপেইয়া আছে। বাঁধহান না খুঁ

ধর্ম সিং অজায় কইনাগরে তার আচালাহানলো পিঠিহানাং বাঁধিয়াই থেছে। উতারগজে, আতদ্বিযোগীহানিলো তেইর জাঙ দ্বিযোগীহানি চেংকরে ধরিয়া থেছে। মুকেইয়া ফুকিয়া যানার উপায় নেই। মি কইনাগরে আতলো ঈশারা করল, খকেস্ত লামিয়া যানারকা উপায় নেই খকেস্ত লামিয়া যানার। নুইলী। উপায় নেই।

বহক গয় কইনাগর ইনাফীর মেইখুস্বীহান ছেচেইয়া মেইথং চেইয়াই তাজ্বব ঐয়া মাতলী - পাবুং, কইনাগতে কৈ, এগোতে আমার গোপালধনর পুতক চন্দরো না।

ছানীফাংনেই ধর্মসিং বহকর আতহানাংত লাঠিগলিয়া বারিহান বেলেইঙ বুলিয়া বুলন দিতেই মি আকফালে তানুর উঠানর বেড়হান লালৈয়া হৌপারে গিয়া হদাছুগা। মোরে লাগ না পেইয়া কইনাগর গজে উবুরীগ ঐয়া পড়িল।

- তা থাকপির পুতক। কইনাগ মালৈয়া মোর খকহানাং চরিয়া নুঙেই অছংতা। আজি খকে চড়ানির নুঙেইহান দেখয়েইতৌ। ধুলিপকর পুতক। আরাক আকখুরুমতে আইতেই তা! আকখুরুমতে পেইতৌ নাই। মুণিগরে কইনা হাজানিহান নিকালতৌ। চন্দরয় মাতের - ইপু, মোর বাঁধহান ফুকাদে, মি লামিং। মোর কি দোষ, রাসবিহারীয়ে মোরে কইনাগ- হাজানিরকা মাটিয়া আনলো হানতে হাজে পড়লুগা। বাঁধহান ফুকেইয়া চন্দররে লামাদিয়া মাতের - তিয়ৌ করিং বুলিয়া মোর পিঠিহানাং ফলল ফালদিয়া কাইলে গ না। এবাকা আকতাউ না হারপেইল সটন দিয়া নাইলতা মালর তা। আজি বাঁধদিয়া থইতৌ। কালি রাজবিহারীয়ে আইয়া নিতেগা। তোর ইতাউ না। তোরে নেনাং আইতে নাই, উপেয় তারে দেখতৌ - বুলিয়া আতহানি ধরিয়া চন্দররে উঠানেস্ত মাংকলে কাকরে নেরগা। বহকগয় মাতলী - পাবুং, চন্দররে এড়ে দে। তার কি দোষ। হাবি কুমেইর জরগতে রাসবিহারী নাই। বারো রাতিহান এগরে কুরাং থৈতাঙাই। এড়ে দে, যাক্গা।

- হাই দে, এড়ে দিলু যাগা, বুলিয়া রূপা বাধাছি লাঠির মুরগলো ছইয়া আকবারিহম পিঠিহানাং আচুলে বেলেয়া মাতলো -

- কিমেন তা! আর খকে কাইতেই তা! আরাক আকদিন জেলাগ হাজতেই তা। আসুটা চন্দর - না করতৌ বুলিয়া জালহানাত তুলিয়া পানীত এড়াতেছি বাউ শৌগর ডেকি পইলা আকফাল দিয়া পিছে যংপলায়তি সংজীবতি - বুলিলগ ঐয়া পড়িং মরিং আকদাপে মুঙর পথগং গিয়া উবা ঐলগা।

পথেস্ত লৌদিয়া মাতের - মুনি দাবদুয়াকুরা। বিয়ানে গাঙহান হাবিত রটা দিতৌ - 'ধর্ম সিং অজায় জেলাগ বুলিয়া মুনিগ দাবদুয়েইল।'

- অ, তাথাকপির পুতক। মুনি জেলাগ। আকদিন পেইতৌ নাই - বুলিয়া ঘরে গিয়া ফামহানাং উবুরীগ ঐয়া পড়িয়া বহকরে ডাহিয়া মাতলো -

- অ বহক গ। খাঙহানাং লেঙৌ খানি তপ্তা দিয়া ফুতিহানাং বেড়েইয়া মোর পিঠিহান, কাঁকালীহান খানি সেক্ দিয়া দে।

লোকায়তির বার্তা

(গেলগা সংখ্যার পিছেকার অংশ)

বলদেব সিংহ

ভারতবর্ষে আৰ্য্য সংস্কৃতিতে পুরাণা, লোকায়ত সংস্কৃতি আছিল। অউ সংস্কৃতির প্রভাব আৰ্য্য সংস্কৃতিতে মিয়াম। লোকায়ত অর্থ লোকের দর্শন তথা জনসাধারণের দর্শন। লোকেষু আয়ত = লোকায়ত, অর্থ্যাৎ জনসাধারণের পরিব্যাপ্ত কারণেই এ দর্শনের নাঙ লোকায়ত। জনসাধারণ বোলতে প্রাকবৈদিক যুগের গনসমাজ। বাইসপত্যসূত্রম আদি শাস্ত্ররমতে লোকায়তির বার্তাই একমাত্র বিদ্যা বারো এ বার্তা মানে কৌটিল্যের মতে কৃষি, পশু পালন বারো বাণিজ্য যেমন 'কৃষি পশুপাল্যে বাণিজ্যচ বার্তা।'

বৈদিক ঐতিহ্য মিয়াম পুরানা বারো পিছেদে যেতায় লোকায়তিক চিন্তাধারা সম্পর্কে নিন্দাবাদ করেসি, আদি বৈদিক যুগে তানোর পূর্বপুরুষ হাবিবয়ে অউ ধ্যান-ধারণারে ঐতিহ্য বোলিয়া নিঙকরাণির উদাহরণ বেদের বহু ফামে আসে। কারণ বেদরমা প্রাচীন ঋকবেদে বৃহস্পতিই গণপতি, লোকায়ত দর্শনের আদি গুরু।

মানব সমাজের পয়লাকার স্তরহান অসিলতায় প্রাক্ বিভক্ত সমাজের স্তর। অউ সমাজের আদিম সাম্যবাদী সমাজ বোলতারা। কারণ অউ সমাজে ব্যক্তিগত সম্পত্তি নেয়ছিল। রাষ্ট্র ব্যবস্থা থানার পরিচয় নেই। গতিকে শাসক-শাসিত, শোষক-শোষিত নেই। হাবিবয়েই স্বাধীন। পৃথিবীর বহু ফামে এবাকান্ত এসাদে সমাজ আসে। লুইচ হেনরি মোগান পণ্ডিত এসাদে সমাজের সম্পর্কে ইকরিয়া গেছেগা। এসাজে সমাজে উৎপাদন শক্তি মিয়াম কম থানায় হাবিবয়ে মিলিয়া মিশিয়া প্রানপণ পরিশ্রম করিয়া প্রকৃতিতে সম্পদ যোগাড় যোগাড় করেছিল। অউ সময়ত উদবৃত্তজীবী শ্রেণীর আবির্ভাব নেয়সিল, হাবিবহান সমান আসিলা। কোনোগোর পক্ষে আকখুলাগ অয়া থানা সম্ভব নাসিল। গতিকে মানুর চেতনাই ব্যক্তিগতে সমৃদ্ধির গজে যাম গুরুত্ব দেসিলা। অউহানলো শ্রম করানি বারো শ্রমের ফল ভোগ করাণিত হাবিবও সমান। কালক্রমে মানুরে সংগ্রাম করিয়া প্রকৃতিতে উৎপাদনের হাতিয়ার প্রয়োজনে যাম উৎপাদন করলা। এ অবস্থাত শ্রম বিভাগের জরম। আকবেদে উৎপাদন কর্মের সংগঠক, অন্যবেদে প্রকৃত শ্রম করিয়া উৎপাদন করাণির দল, সংগঠক দলে কোন কাম কাজে অংশ গ্রহন না করিয়া বরং তানো মুর ঘামেয়া বুদ্ধি-চিন্তালো সংগঠন করিয়া আরামে থানার কাম। এসাদে সংগঠনের দলে পুরোহিত সৃষ্টি। পুরোহিত শ্রেণী উৎপাদনের মালিক নাইলেও উৎপাদনের কাম তদারক উৎপাদন রক্ষা, সমাজ বা শ্রেণীর হিতরকা চিন্তা-চর্চা করানি। কিন্তু কালক্রমে কর্তৃত্বের প্রভারে উৎপাদনের মালিক অয়লা। রক্ষকেই ভক্ষক এসাদে আকবেদে শ্রম বিমুখ মালিক শ্রেণী আকবেদে শ্রমিক শ্রেণী চিন্তা চর্চা করানিত বঞ্চিত। শ্রেণী বিভাগের অনিবার্য ফলস্বরূপে দেহা দিল শ্রমের লগে চিন্তার বিচ্ছেদ। বংশ পরম্পরায় শ্রমের কপান্তর ঘটিল। শিকার বারো পশুপালনের লগে কৃষিকার্য্য যোগ অয়ল। কালক্রমে লুরি কাটা ফুতি বোনা, ধাতুর কাম,

কুমারের কাম বানিজ্য বারো শিল্পের লগে যোগ অয়ল চারুকলা বারো বিজ্ঞান। গোষ্ঠীর ফামে দেহা দিল জাতি, রাজ্য। এসাজে করিয়া কালক্রমে প্রকৃতি সম্বন্ধে ভাববাদী আধ্যাত্মবাদী দৃষ্টিভঙ্গীর জরম অয়ল। যতই আধ্যাত্মিক তথা দার্শনিক ভাবের চিন্তাধারা উন্নত অর, ততই প্রকৃত কর্ম জীবনের ভাবেই দূরেই অ যিতারাগা বারো তানোর চেতনাই বাস্তবের যথার্থতা উপ নারতারা। এসাদে ক্রমাধ্বয়ে কর্ম জীবনেও দূরেই অয়া কর্মের প্রত্যক্ষ দায়িত্ব মুক্তি পেইলা বারো কর্ম করেকুরা শ্রমিক মানুরে আলিপানা অকরলা। অউ কারণে আধ্যাত্মবাদী বা ভাববাদী বা নাঙর উদবৃত্ত জীবীর চিন্তা সৃষ্ট শাস্ত্রত দেশত হাবিব রকমের মানুর পৌনাপেয়ার। হুদা থারতা কর্মের দায়িত্ব না লয়া অন্যব শ্রমের ফলভোগ করার অধিকার বারো অউ রাজশক্তিরে দেবশক্তি বোলিয়া প্রচার বারানিয়ে আত্যাধ্যাত্মবাদের সৃষ্টি। দ্বিত্যতাও সমসাময়িক বারো পরিপূরক। অউহানলো রাজা রাজেশ্বরে মুনি, ঋষি, পণ্ডিতের সম্মান দেহরোয়া বারো অউতারে শ্রদ্ধা বিশ্বাস করানিরকা শ্রমিক জনগণেরে উচলা দিলা বারো পণ্ডিতশ্রেণীয়ে রাজারে হাবিব সময় সমর্থন করতারা। রাজশক্তির সমর্থক পণ্ডিতে ক্রমাধ্বয়ে নিষ্কর্মা অয়া খানাপিনার বিনিময়ে রাজশক্তির সপক্ষে থাইলা।

রাষ্ট্রশক্তির আবির্ভাব বিষয়ে মহাভারতে ভীষ্মই মাতেসিল সর্বপ্রথম পৃথিবীতে রাজা, রাজা, দণ্ড দণ্ডই ব্যক্তি আদি কোনোজন নেয়সিল। ভীষ্মের মতে এসাদে অবস্থাও রক্ষা করানিরকা রাজা, রাজনীতি বারো রাজধর্ম সৃষ্টি। উপনিষদ আদিত রাজধর্মের দৈবশক্তি সম্পন্ন শ্রেষ্ঠ সমাজ ব্যবস্থা বোলিয়া প্রতিপন্ন করিয়া আদিম সাম্যবাদী সমাজের হাবিব চিনরে নিন্দাবাদ করলা।

অর্য্যধর্ম হুদা পশুপালক মানবদির ধর্ম না বোলিয়া আৰ্য্য-অনার্য্য দ্বিত্যতার শ্রেণী বিভক্ত সৃষ্টিকারী পুরোহিত তথা রাষ্ট্রশক্তির ধর্ম বোলানি যাকরের। নগর সভ্যতা বারো লিখিত ভাষারে উন্নত মাতৃক্রমিক সাধারণ গনসমাজেও কার্য্য সহিষু পশুপালক পিতৃক্রমিক মানুরে পুরোহিত, রাষ্ট্রশক্তির উৎপত্তির আদি প্রাথমিক শিক্ষালো স্থায়ী বসতি করিয়া বারো জনসাধারণ তথা প্রকৃতভাবে সংস্কার করিয়া সংস্কৃত করলা।

গননা পাছিল প্রয়োজনীয় প্রশংসা সমাজ ব্যবস্থা। অউ সময়ত দ্যৌ হাবিবর গুরু বৃহস্পতিরে গনপতি বোলেসিলা।

গনানাং ত্বাং গনপতি হবামহে

কবিং কবিনামু প্রসবন্তুমম' ঋকবেদ দ্বিতীয় মণ্ডল।

“গনানাং ত্বাং গণপতি হবামহে

প্রিয়ানাং ত্বাং প্রিয়াপতি হবামহে’- বাজসনেয়ী সংহিতা

অর্থ্যাৎ ব্রহ্মগণপতি তি গন হাবিবর গনপতি, কবিরও কবি, হাবিব অন্নর উপমা স্বরূপ অন্ন যেতারাং আছে তি উতারাং শ্রেষ্ঠ। শ্রম

মানে অন্ন, ব্রহ্মণ শব্দও অন্নবাচক। 'ব্রহ্মণ অন্নস্য পরিব্যয়স্য কর্মনো বা পতে পালয়তি।' স্বকবেদে গন 'শব্দর বহু প্রয়োগ থানায় যাজ্ঞিক ঋষিবর্গ গন বা গনবাসী অসিলা। অউ মণ্ডলে ঋষিয়ে ইন্দ্রে আহ্বান করেসি- হে গনপতি গন হাবিবরমা আসন গ্রহণ কারিক। অথর্ববেদে গনর জয়গান আসে-গন হাবিব রং এরে অর্পন এরে মহাগনরাং অর্পন। এতান্ত হারপা পারিয়ার যে আর্য- অনার্য হাবিবয়েং সময় আহানাৎ এ গনসমাজে বাস করেসিলা। গনসমাজে পুরোহিত শ্রেণী বারো রাষ্ট্রশক্তির উৎপত্তি অনায় উচ্চ শ্রেণী গন উতাই সাধারণ প্রজারে গন, ব্রত্যা আদি নাঙ দিয়া নিজরাংত নিম্ন শ্রেণী বোলিয়া প্রতিপন্ন করলা। এসাদে উচ্চ শ্রেণী নিম্নশ্রেণী বিভিন্ন অনায় শ্রমর ফলভোগ করানিত বহু বছর যুদ্ধ চলেছিল। যুদ্ধে পুরোহিত বারো ধর্মর সাপেক্ষ দলহানেই উপনিষদ আদি রচনাত গনসমাজর ঐতিহ্য, সাংস্কৃতি হাবিব নিজরতা বোলিয়া করলা। মৈত্রায়ন

উপনিষদে উল্লেখ যে দেবগুরু বৃহস্পতিয়ে শুক্রচার্যর ছাত্রবেশত অসুরদলে বস্তুবাদী লোকায়ত গ্রহণ বারো প্রচার করানিয়ে অসুরর নৈতিক পতন অসে বোলিয়া মাতেসে। পাঞ্চালরাজ প্রবাহনে শ্বেত কেতুরে পরলোকত বারো আর্যঃ বিদ্যা সম্পর্কে পাচহান প্রশ্ন করেসিল। কিন্তু শ্বেতকেতুরে উত্তর দিয়া নারেসিল। বাপক উদ্দালকে হারপেইল যে অউ বিদ্যা হুদা ক্ষত্রিয়ই জানেসিলা, বান্ধাণে নাজানেসি। অউ বিদ্যার বলে রাজ্য শাসন করতে রাজা অনায় ক্ষমতা ক্ষত্রিয়ই পাসিতা। এ আধ্যাত্মবাদ হুদা শাসক শ্রেণীর দর্শন নাগয় শাসক শ্রেণীর হাতিয়ার। এসা লোকায়তির ধ্যান-ধারণা তথা সংস্কৃতি শক্তিশালী অনায় ব্রাহ্মণ্য সংস্কৃতির ভয়র কারণ অয়ল। অউহানলো মহর্ষি ভৃগুমুনি মনুস্মৃতিত লোকায়ত সংস্কৃতির বিরোদ্ধে মাতেসিল। লোকায়তির মতাদর্শনেই ভারতর প্রাক-বৈদিক আদিম আদর্শ।


(ক্রমশঃ)

মানব ব্যবহার

ব্রজ গোপাল

জীবনর হারোপা অস্তিত্বরকা বারো সফলতারকা কুশল মানব ব্যবহার অপরিহার্য। ঐ কারণে মানবীয় আচরণ জ্ঞান হারপানি থকর। মানু আগর আচরণ ঐ বিশেষ সময় ঐহানাৎ তার আবশ্যকতার (Needs) গজে নির্ভর করে। তার আবশ্যকতারে সন্তুষ্ট করে পারলে তার আচরণ সাকারাত্মক অইতই। ঐ মানুঐগে অন্য সময়ে তার আবশ্যকতার ভিন্নতার কারণে অন্য আচরণ করতৈ।

বিখ্যাত মনোবৈজ্ঞানিক এব্রাহাম মাসলোর মতে মানুর আবশ্যকতা (Needs) তলর চিত্রর অনুরূপ। প্রধানতঃ ৩ ভাগে ভাগ করানি যাকরের।



ক) বুনিয়াদি আবশ্যকতা (Basic Needs) জীবন ধারণ তথা সুরক্ষা সম্বন্ধীয় আবশ্যকতা।

খ) ভাবনাত্মক আবশ্যকতা (Emotional Needs) এহানাত স্বাভিমান, আত্মপরিচয়, যৌন ইচ্ছা পূরণ তথা সামাজিক প্রয়োজনীয়তা शामिल।

গ) আধ্যাত্মিক আবশ্যকতা (Spiritual Needs) ব্যক্তির নিজরে হারপানির আবশ্যকতা

(ক) বুনিয়াদি আবশ্যকতা : জীবন ধারণর কারণে পানী, বায়ু, খাদ্য বারো, নিদ্রা অতি আবশ্যক। এস্তরে মানু প্রয়োজনর খাতিরে পাশবিক পর্যায় এতার। পরবর্তী আবশ্যকতা, ঐলতায় সুরক্ষা। ঘর, ফুটি, চাকরী

ইত্যাদি।

(খ) ভাবনাত্মক আবশ্যিকতা : বুনিয়াদি চাহিদা পূরণ অনার লগে লগে সূক্ষ্ম ভাবনাত্মক চাহিদা জাগিয়া উঠের। স্বভাবতঃ বন্ধুত্ব, পরস্পর সম্বন্ধ, ভালবাসা, যৌন চাহিদা ইত্যাদি উজাগর অর।

আরাকখানি গভীর মনর স্তরেত্ব স্বাভিমান জাগিয়া উঠের। নিজর তথা অনার আত্ম সন্মান, নিজর ক্ষমতা, আত্মনির্ভরতা, প্রতিষ্ঠা ইত্যাদির চাহিদা জাগের। উদাহরণ স্বরূপ অমিতাভ বচ্চনর দাদাসাহেব ফালকে সন্মান নাপেয়া দুঃখ করানি পারা। এ অবস্থাত মানু আত্মকেন্দ্রিক ভাবনা ত্যাগ করিয়া দশর চিন্তা, সমাজসেবা ইত্যাদি চিন্তাগ্রস্ত ঐতারা। এ চাহিদা ত্রতা পূর্ণ অইলে তৃপ্তি আহের।

(গ) আধ্যাত্মিক আবশ্যিকতা : এ স্তরে ফৌঅয়া মানু কোন বিশেষ কর্ম আহান করানির প্রেরণা পেইতারা। হয়তো বা আত্ম অন্বেষণ বা অসাধারণ কিতা আহানি করিয়া হাবির স্মরণীয় অনার বাসনা। ধন দৌলতই হাবিতা নাগয় এ ভাবনা এহান জাগের। অথবা গুরু বা পণ্ডিত শ্রেষ্ঠ পদ পানার বাসনা।

চাহিদা মানব আচরণ সংগঠনা করের :

মাসলোর শ্রেণীবদ্ধ চাহিদা বিশ্লেষণ করলে পরিস্কার অর যে মানব আচরণ তার অপূর্ণ চাহিদালো পরিচালিত অর। স্তব তলেত্ব গজেদেই পরপর জিতইগা এমন কথা নাগয়। কোন সময় কোন স্তর এরেদিতে ও পারে বা আগে পিছে ও ঐতে পারে।

মানুরে প্রেরনা দেনা মনেইলে বা নিজর ইচ্ছামতে কাম করবানি মনেইলে এ মানব চাহিদা এতার প্রতি সূক্ষ্ম নজর থনা অতি আবশ্যক।

আমারতা হারপানি লাগতই বারো স্মরণ থনা লাগতই - মানুর স্বভাব বিশ্বাস - যথা :

মানব আত্মকেন্দ্রিক

মানব স্বাধীনতা প্রিয়

মানব বানা-নুংশী মনেইতারা

মানব স্বীকৃতির কাঙাল

মানব আত্মকেন্দ্রিক : স্বাভাবিক কারণেই মানু নিজর চাহিদারেই প্রাথমিকতা দিতারা। নিজরে জিততা থনার প্রবল ইচ্ছা প্রতি প্রানীর বিদ্যমান। এ কারণে মানু ও এ স্বভাবর বহির্ভূত নাগয়।

এ কারণে কোন অন্য ব্যক্তিরে নিজর ইচ্ছামত কাম করবানি মনেইলে ও মানু ঔগর স্বাভাবিক মানবীয় চাহিদা পূরণ করাগি লাগতই। এ জ্ঞান এহান সুচারু মানব সম্বন্ধর ক্ষেত্রে অতি প্রয়োজন।

মানব স্বাধীনতা প্রিয় : মুক্ত জীবন। এ শব্দগিত হাবিতা নিহিত। পশু, মানব হাবিও স্বাধীন জীবন চেইতারা। সৌ-জিপুত, পাড়া প্রতিবেশী হাবি নিজর স্বাধীন জীবনর পক্ষপাতি। এ স্বাধীনতাত ব্যাঘাত অইলেই যত অনর্থ।

এ জ্ঞান এহান সুখকর পারিবারিক জীবন, তৃপ্ত চাকরী জীবন তথা হারোপা সামাজিক জীবন দে পারের।

মানব বানা-নুংশী মনেইতারা : বানা-নুংশীর খৌরাও প্রতি জীবর চাহিদাহান। এহান দিয়া পারলে হাবি কাম ফতে। কিন্তু বানা-নুংশীর ব্যাপারে তলর কথাহানি স্মরণ থনা লাগতই।

১) শব্দত্ব কামর মাধ্যম যাম প্রভাবশীল। (অর্থাৎ ভণ্ডামি না চলতই। প্রকৃত বানাহান কামর মাধ্যমেই প্রকাশ অর)

২) বানা দয়া মিশ্রিত এহান অনার কাদাত জানার সুযোগ করে দেব। করুণা অনার মন জয় করার।

৩) বানা ক্ষমার রূপহান। মানুরে দোষ-গুণ সহ গ্রহণ করানির ক্ষমতা দেব। এহান হুতুমে করে পারলে তি ঈশ্বরর কাদাত জানা পারতেই।

৪) বানা-শর্তহীন - দেয়া নেয়ার বাহিরে। বাপক-মালক হিসাবে সৌ রে আমি শর্তহীন বানানুংশি দিয়ার। অন্যরে এহান দিয়া পারলে জয় তোরতা।

৫) বানা থাইলে কঠোরতাও থানা লাগতই। মনে হিন দেনা না মনোয়া কঠোর সত্যহান না মাতিয়ার। প্রকৃত বানা নম্রতা পূর্ণ কঠোর সত্য মাতানির দাবী করের।

৬) প্রেম নম্রতা স্বরূপ। অহঙ্কার লেশ লেই। অন্যর ভাবনারে (Emotion) চোট না দিয়া তার চাহিদারে গুরুত্ব দেব।

৭) লয়ইতেগা - প্রেম ক্ষণিক নাগই। স্থির অয়া যত ঘন ঘন বিলেইতেই তত লাভ।

ঈশ্বরর সৃষ্টিত আহিগ দিলেই দেখতেই বন্য জন্তুরাংত চিংকরিয়া হাবি প্রাণীরাং নিজর সৌর কা বুলিয়া বানা বিলোয়া থদেচে।

প্রেম, বানা নুংশি পৃথিবীর শ্রেষ্ঠ হাতিয়ার।

(ক্রমশঃ)

দ্রৌপদী - সত্যভামা

(গেলগা সংখ্যার পিছেকার অংশ)

রাধাকান্ত সিংহ

নরসিংপুর

- তি কোন সময় হারপেইল চেষ্টা করেছিলোতা কৃষ্ণা ? কিসাদে তোর ধারণা যে তোর স্বামী উতার মত বীর, পাণ্ডবগণর মত ধার্মিক আব দ্বিতীয় নেই ? বোধহয় দ্রৌপদীর মনর কথা হাবি আচুলিয়া নিকালানিরকা সত্যভামার প্রপঞ্চহান। - মোর শ্যাম সুন্দর ও তে কম

নাগয়, কিন্তু তার সেবা যত্নর ত্রুটি যত দূর সম্ভব নার, তবু তারে কিয়া মোর বশে থনা নুয়ারোরিতা ?

- ভামা, এহান মোর অন্তরর কথা হান। মোর বিশ্বাসর সামগ্রী। তি হুতুমেহান মাতলে। মি হারপানির কোন চেষ্টা নাকরেছ, বারো

নাউ করতো। মি যেতারাং মনে-প্রাণে আক খুরম সমর্পন করলু, তানুরে ছাড়া মি কারেউ কোনদিন হারপেইল চেষ্টা নাও করতো। মি মোর বিবেক বুজিল হারপেইল চেষ্টা করৌরি, মোর পতিয়ে কিতা চেইতারা কিহান মোরাংত পানা মনেইতারাহান, মোরাংত কিহান পেইলে তালু সুখী অয়তাই।

- এহান কি পুরুষর ইচ্ছার মা নারীর অস্তিত্বরে কাতকরে দেনাহান নাইলতা ? নারীর কি নিজস্ব কোন সত্ত্বা থানা নুয়ারেরতা ? ধর্ম সাক্ষী করিয়া নারীই শুধু পুরুষরে পতিত্বে বরণ করতারাতা নাগয়নাই ?

- তোর কথার প্রতিবাদ করৌরিতা নাগয়, বারো করৌরি ভামা - এ কথা এহান কিসাদে করে পাছরলেতা যে পুরুষ সমুদ্র বারো নারী নদী। তার অস্তিত্ব, তার স্বাতন্ত্র্য হাবি ও সাগরে একাকার। ভিন্ন পথগামী অয়াউ গুরু নিজর হিনহানই রাডেইতয়, নিজর মিলনর পথগ করে তুলতই বন্ধুর। মি এহান মোর হৃদয় বারো বিবেকলো হারপাছুহান সখি, ঔহানলো মোর হতিনা উতারেল মোর পতি উতারাং নিজরে সমর্পন করিয়া থছু। স্বামী সঙ্গছাড়া মি কোনপেই না নুকুলউরী। ভামা মোর পতির লগে এমন কোন কথা না টটরাউরি যাতে তানু মনে নুঙেই নাপেইতারা। মোর পতির ইঙ্গিত হারপেয়া চলতে খানিগ্লারাউ সংকোচবোধ নাকরৌরি। মি মনে করৌরি, নিজরে বেহায়া বা নিলজ্জ নাকরিয়া পতির ইঙ্গিত হারপেয়া চলানি উহানরেই পত্নির প্রধান কর্তব্যহান। যেহান তানুর অপছন্দ, মোর মনে অতি বাসনা জাগলেউ দমন করিয়া থউরি, বারো এহানেই মোর ধর্মহান মনে করৌরি।

- খানি থামিয়া বারো দ্রৌপদীয়ে মাতিরী - ভামা- পতির মন জয় করানি অইলে পতিগই সবসময় চেষ্টা করানি লাগতই গৃহিনী, ঘরণী অনার। বিশ্বাস কর সময়ে সময়ে কায়ো মনোবাক্যে এহানর চেষ্টা করিয়া আহৌরী। গৃহস্থর ধর্মত্ব খানিগ্লারাউ বিচ্যুৎ নাকরৌরী। যেমন কোন কারণে কোন দিন মোর স্বামী এতারে অনাদর নাকরৌরি ঠিক উসাদে নাকরৌরি পৃথিবীর মাতা ক্ষমাশীলা মোর হৌরিয়ক কুস্তীদেবীর। নারী আগ হিসাবে আচরণীয় যে যে ধর্ম যেমন বিনয়, নম্রতা, ধীরতা এসাদে হাবিতালো স্বামীর সেবা করৌরি, ঠিক উসাদে সেবা করৌরি আত্মীয়, কুটুম্ব অতিথির। মোর কামে কোনদিন আরাক আগরে চেয়া নাথাউরী।

- হায়দে কৃষ্ণ, ঘরণী অয়া তি তোর নিখুঁত কাম এতালো কি পঞ্চপাণ্ডবর মন জয় করেছততা ? আরতা কিতালৌউ নাগয়তা ?

- না ভামা, শুধু এসাদে করিয়া ঘরণী অনা যাকরলেউ, স্বামীরে নিরুদ্দিগ্ন করিয়া থনারকা পত্নিরতা আরাকউ খানি করাণি লাগের। হাবি দিকেত্ব স্বামীরে নিশ্চিত্ত করিয়া থনার ডাঙর দায়িত্ব আহান যে আছে ঘরণীর। যতক্ষণ পেয়া সুষ্ঠুভাবে ও দায়িত্ব পালন করানি নুয়ারেছে স্বামীর সম্পূর্ণ আস্থা অর্জন করানি কিসাদে পারতইতা মাত ?

- কিহান ও দায়িত্ব উহান ? আংকরিরি সত্যভামায়-

- মাঠৌরী ছন - হস্তিনাপুরে থাইতে পাণ্ডবপ্রজ নিত্যব্রত হিসাবে যে রাজসূয় যজ্ঞ করেছিল ঔহান তি হারনাপাছত হান নাগৈ। নিক্কা

আট হাজার বামুন ছনার পুকামে অন্ন গ্রহণ করলা। ত্রিশ হাজার স্নাতক গৃহস্থ আছিল। তাঁর আশ্রয়ে যেতার ভরণ পোষণ করেছিল বারো আকেইগর পরিচর্যার কা বুলিয়া ত্রিশগ করে দাসী নিযুক্ত আছিল। - এর পিছেও নিক্কা দশহাজার সম্ম্যাসীরে বিশুদ্ধ সোণার পাত্রলো ভক্ষণ দেনা, এরপিছেউ আছিল অ-গণিত পশু-পাখির সেবা, ধর্মরাজর এহান নিত্য যজ্ঞ আছিল। তি হার পাছত ভামা, কোন দিন কোন অতিথি ধর্ম-রাজরাংত বিমুখ অয়া নাগেছিগা ? যাতে কোন আগ অভুক্ত অয়া ফিরিয়া নাযানি, যেতারকা বুলিয়া একলক্ষ পরিচারিকা নিযুক্ত করেছিল। তানু সবসময় পরিচ্ছন্ন বেশভূষালো আছিল ঔযজ্ঞে ভামা মি নিজেও মোর দেহাগর বারাদে নাচেয়া ধর্মরাজর লগে প্রসন্নচিত্তে ও বামণ উতার যথোচিত সংকার করেছিল। মি হাবির নাওউ হারপাছিলু, বারো খবরও থছিলু কোনগই কিতা করতারা না-করতার।

- ছনতে ছনতে বিস্মিত অইলি সত্যভামা - কিতা মাতউরিতা ? কিসাদে এহান সম্ভবতা ?

- সম্ভব-অসম্ভবর কথা মি হারনাপাছু সখি। মি মনে করেছিলু এহান মোর কর্তব্যহান। ছন্দা মোর স্বামীরতা নাগয়। মোর মন এহান মি ওসাদে হংকরেছিলু উহানে কোন হিন মি হারনাপাছু। মনে অছিল স্বামীর এ ব্রত এহানাং মি ব্রতচারিণী অয়া সাহায্য করে পারিয়া মহানন্দে আছিলু। গো-পালকেত্ব মেষপালক এমনকি অন্তঃপুরর হাবি কাম মি তদারকি করেছিলু, ছন্দা এতা নাগয় পাণ্ডবপ্রজ যেবাকা কোন জাগাত গেলগা, তাঁর অনুগমন করানিরকা একলক্ষ হাতি ঘড়ালো গেলগা। ঠিক ঠিক যিতারাগা কি-না, আয়া ফামে ফামে ঠিক ঠিক থনা অইল কি না উতা হাবি মোর নজরর মা আছিল। খানিগ্লারাউ কোন ভুল অনা নাদেছু। যদি মাতউরী এতা কিয়া করেছিলেতা ? - সখি এতা হাবি চাকর-বাকরর গজে এরাদিয়া কি নিশ্চিত্তে থানা থকরতা ? বীরপুরুষ মোর স্বামী এতা বাহিরে তানুর বিরাট দায়িত্ব পালন করতায়তা না অন্তঃপুরর এতা চেইতাইতা পতিরে নিশ্চিত্ত অয়া থানার দায়িত্ব যেবাকা পত্নির, উপেই ঘরণী বা গৃহিনী হিসাবে স্ত্রী এ করাণি থকর মনে করৌরি -

- খানি থামিয়া দ্রৌপদীয়ে বারো মাতিরী - তি ছনলে হয়তো আরকউ নুংপিং অইতেই। মোর স্বামীর ধনভাণ্ডারে কিতা আছে, কিতা নেই, কত আয় অর, কত ব্যয় অর তার হিসাব আছিলতা মোর নখদপনে। কিয়া থছিলু, কোন কারণে যাতে মোর স্বামী এতা নানা কামর মাধ্যমে তানুরতা বিভ্রান্তি অনা এহান স্বাবাবিকহান, স্ত্রী আগ অয়া যদি তানুর বিভ্রান্তিমুক্ত করে নুয়ারলে পত্নীর কোন্ দায়িত্বহান পালন করলুতা ?

- হাবি ছনিয়া সত্যভামায় মাতিরি - সখি হারপেইলু ছন্তুমেউ তোর সংযম বারো আত্মত্যাগর তুলনা নেই। যে রহস্যর গোলকধাঁধায় মি এতদিন বুলেছিলু আজি শেষ অইল।

- ঔগদে শ্রীকৃষ্ণর যানার সময়হান অযারগা। ইসারায় দ্রৌপদিরাংত বিদায় নিলগা সত্যভামায়। রমণী আগ অয়া আরাক রমণী আগরাংত স্বামী-সাধনার অপরূপ অনবদ্য বৃত্তান্ত আহান লগে করিয়া গেলিগা সত্যভামায়।

গুরু দেবেন্দ্র সিংহ

সুনীল সিংহ

এলা নাছার জগতে নাঙ পালয়া আমার মানুর ভিতরে যে কতগ মানু মুম্বাই শহরে আছি উতার ভিতরে উল্লেখযোগ্য মানু আগ অইলতায় গুরু দেবেন্দ্র সিংহ। তা বিখ্যাত নৃত্য গুরু স্বর্গীয় গুরু বিপিন সিংহ বারো স্বর্গীয় সুরেন্দ্র সিংহর খুন্না বেয়কগ।

১ লা এপ্রিল, ১৯৩১ ইংরেজীত সিঙ্গারী গাঁওে বাপক কবিরত্ন লৈখম সেনা সিংহ, বারো মালক পুণ্যবতী ইন্দুবালা দেবীর কোকে জরম অছিল।

গুরু বিপিন সিংহ মুম্বাই শহরে I.N.T. (Indian National Theatre) র সৌজন্যে বারো নিজর পরিচালনাত উষাহরণ নাঙর নৃত্য নাটিকা আহান বারো ঢোল চলনর ঠৌরাঙ করেছিল ১৯৫১ ইংরেজীত। উষাহরণ নৃত্য নাটিকা উহান উবাংকার আসামর বানরাজার জিলক রাজকুমারী উষা বারো শ্রীকৃষ্ণর নাতিয়ক অনিরুদ্ধর প্রেমর যারির গজে হঙছিল হান। নৃত্য নাটিকা উহানাত উষার চরিত্রহান গুরু বিপিনর শিষ্যা নয়না জাবেরীয়ে করেছিল। নৃত্য নাটিকা উহান হিন্দী বারো গুজরাটী দ্বিভাষাতেই অভিনীত অছিল। অন্যবেদে ঢোল চলন উহান দেহুবানিরকা বুলিয়া বিপিনর সললাল আমার সমাজর উদীয়মান কতগী শিল্পীরে বার্তন করানি অছিল। উ শিল্পী উগি অইলাতায় যথাক্রমে - গুরু রথীন্দ্র সিংহ (ধূস), অজা গৌরহরি, বারমুনি স্থিত মনাল সিংহর দ্বিভাষেই বৈবুনি, মৃদঙ্গাচার্য নীলমাধব মুখার্জী বারো দোয়ার মদনচাঁন সিংহ। এ শিল্পী এগিরে মুম্বাইত। থিলকরানিত বুলিয়া ১৯৫১ ইংরেজীত পয়লাকারকা বুলিয়া গুরু দেবেন্দ্র সিংহ মুম্বাই ফৌয়ছিল। পিছে পিছে ১৯৫২ ইংরেজীত উপেইতেই পাকরানিরকা বুলিয়া তারে মুম্বাইস্থিত বাঙলা মাধ্যমর স্কুল আগত বেয়কে ভর্তি করে দিল। কিন্তু এলা নাচার ক্ষেত্রে টান উহান থানারকা বুলিয়া পড়াশুনার ক্ষেত্রে তা নিয়াম আওয়ানি নুয়ারল। উহান দেহিয়া জেঠা বেয়ক গুরু বিপিন সিংহ ১৯৫৩ ইংরেজীত তারে পরম্পরা মণিপুরী নাছা হিকানিরকা বুলিয়া মণিপুরে দিয়া পেঠা দিল। উপেইত প্রায় বছর আহান ধরিয়া থায়া গোবিন্দ জীউ মন্দিরর পরম্পরা গুরু শর্মা গিরকরাং নাচা তামকরল। দেবেন্দ্রর লগে সহছাত্রী হিসাবে আছিলাতায় গুরু বিপিনর শিষ্যা ববিতা বারো নির্মালা মেহেতা। ১৯৫৪ ইংরেজীত বিদ্যাহানর পর্যায় আহান লমকরিয়া তা বারো মুম্বাইত ফিরিয়া গেছিলগ।

১৯৫৪ ইংরেজীত মুম্বাইত ফিরানির পিছে অক্টোবর মাসে তা ভারতীয় বিদ্যা ভবনে নাছার লেকচারারগ অয়া হমেইল। লগে মুম্বাই শহরে গুরু বিপিনে লিঙখাত করা মণিপুরী নর্তনালয়ত বাগাদিল। বিভিন্ন সময়ে তা গুরু বিপিন সিংহর তত্ত্বাবধানে নিয়াম লুয়া নাছা হিকেছিল বারো শিক্ষা সম্পূর্ণ অইলে নর্তনাচার্যর

উপযুক্ত সার্টিফিকেট পাছিল। পিছে পিছে তা ১৯৬৯ ইংরেজীত ভারতীয় বিদ্যাভবন এরা দিয়া যোগেন্দ্র দেশাই বুল্লা গিরক গয় লিঙখাত করেছিল কলা ভবনে হমেইলগ। কলাভবনে থাইতে তা বাক্সা কতহান নৃত্যনাটিকা রচাছিল বারো পরিচালনাউ করেছিল। উতার ভিতরে উল্লেখযোগ্য কতহান অইলতায় - সুরদাস, পরিবর্তন, আলবেলা বিনা আজুরালু - নাটিকা উহান গুজরাটীত অছিলহান। আরতা যেহানর নির্দেশনা যোগেন্দ্র দেশাই বারো আশা পারেখে করেছিলহান, চউলা দেবী - উহানউ গুজরাটী বারো হিন্দী ভাষাত অছিলহান, অনারকলি - উহান গুরু দেবেন্দ্রর রচনা বারো নির্দেশনাত আছিল।

জীবনর পরবর্তী অধ্যায়ে গিরকে স্বতন্ত্র স্কুল আগ করানির নিঙে ১৯৬৪ ইংরেজীত মুম্বাইর সি পি ট্যাংক বুলতারা জাগা উহানাত 'নর্তনবীথি' বুলিয়া স্কুল আগ লিঙখাত করেছিল। স্কুল উগ বাক্সা কতবছর ধরিয়া হবা অয়া চলেছিল। উ তাঞ্জা উগত গিরকে লাঙ্গল এলা, নাচা রচনা বারো পরিচালনাউ করেছিল। উতার ভিতরে উল্লেখযোগ্য কতহান অইলতায় - বিচিত্র মিলন, নবরত্ন, চিত্রাঙ্গদা, ভানু সিংহের পদাবলী আদি। নাছা। উহানি চেয়া দর্শকে নিয়াম থাকতে দেছিল।

১৯৭১ ইংরেজীত শিক্ষকগ হিসাবে গিরকর নুবা জীবন আহান বারো আরঙ অইল। তা মুম্বাইর জুথস্থিত নাঙকরা যমুনাবাই নাছার স্কুলে সুপারভাইজর ইনচার্জ ইন হবি এণ্ড কালচারেল একটিভিটি পোস্ট - উহানত যোগদান করল। স্কুল উগত হিন্দী সিনেমা জগতর বহু নায়ক নায়িকা শৌ জিপুত পাকরল। স্কুল উগত শিক্ষকতা কালে গিরকে বিভিন্ন প্রোগ্রাম করানির গজে টেলিভিশন প্রোগ্রাম করল। উতার ভিতরে 'লোভী হিয়াল' উল্লেখযোগ্য।

সুদীর্ঘ ২৫ বছর স্কুল উগত কাম করানির পিছে ১৯৯৫ ইংরেজীত গিরকে স্কুল উগত অবসর নেছিলগ। সিনেমা লাইনর বহু নবাগত নায়ক নায়িকা তার ছাত্র-ছাত্রী আছিল। উতার ভিতরে উল্লেখযোগ্য অইলতায় সানি দেউল, লব-কুশ (শত্রুয় সিনহার জিপুতদ্বয়), কুনাল গোস্বামী, রবীনা টেগুন, ভাগ্যশ্রী, ববি দেউল, ফরদিনখান (ফিরোজখানর পুতক), জাবেদখান (সঞ্জয়খানর পুতক), শ্বেতা বচ্চন, অভিষেক বচ্চন বারো ইশা দেউল আদি।

উতা বাদে পরম্পরা নৃত্য লাইনে গিরকর শিষ্য বারো শিষ্যা অইলাতায় যথাক্রমে রাজা বৈধ, আশা টঙ্কর, স্মিতা ডাডিয়া, ইন্দুবালা জাবেরী, মণিষা কোহেলী (চরিত্রভি নেতা দেবকুমারর জিলক), বাসন্তী দেশাই, রাকা ভাদুড়ী, ক্রমা ভাদুড়ী (তানু দ্বিগি নায়িকা রীতা ভাদুড়ীর জেঠী বনকগি) কল্পনা ডোগরা আদি। কল্পনা

ভোগরা সময় আহানাত নটীবই, পাঁচ দেবীয়া, প্রফেসার, চাইনা টাউন আদি সিনেমাত নায়িকাগ অয়া কিশোর কুমার, দেবানন্দ, শাম্মী কাপুর আদির লগে কাম করিছিল।

বর্তমানে সত্তর দশকের উর্ধ্বে আছে উদ্যমী গুরু দেবেন্দ্র সিংহ গিরক যশোদারেল এল, এল, স্কুলে শিক্ষারত অয়া আছে। শিক্ষকগ অয়াই নিয়াম সময় অতিবাহিত করেছে হান্তে তা উসাদে সন্মানউ আশা নাকরের। যেতা করুবাছে উতা তা তার ছাত্র-ছাত্রী, শিষ্যর মাধ্যমেই করুবাছে। হাবির বানা-নুঙশি পানা উহানে তা ডাঙর সন্মানহান বুলিয়া নিঙকরের। আজি মুখাইর নৃত্য জগতে গুরু

দেবেন্দ্র সিংহ চিরপরিচিত নাঙ আহান।

গিরকর খুন্না পুতক হেমু সিংহ বর্তমানে মডার্ন ব্রেকড্যান্সরর শ্রেষ্ঠ শিল্পী আগ। গিরক বিষ্ণুপ্রিয়া মণিপুরী সাহিত্যর পূজারীগ। সুস্থ সমাজ আহান জিংতা অয়া থাইতে রুচিপূর্ণ শিল্প সংস্কৃতি বারো সাহিত্যর প্রয়োজন উহান গিরকে নিয়াম অনুধাবন করে। তাঁর প্রিয় লেখক কবি ব্রজেন্দ্র সিংহ, স্বর্গীয় জগৎমোহন সিংহ। নুয়া এলাত গিরকে হাদি হাদিত লেখের। জীবন পরিক্রমার লেইসী বারেইতে ঈশ্বররাঙ গিরকর সুস্বাস্থ্য বারো দীর্ঘায়ু কামনা করুৱী।

চিঠি পত্রে মতামত

(চিঠিপত্রে মতামতরকা সম্পাদক, সংকলক, প্রকাশক দায়ী নাইগে)

সম্পাদক ডাঙরীয়া,

‘অপরূপা’ সাহিত্য সংকলন মাঘ, ১৪১১ সন সংখ্যা পেইয়া অতি হারৌ অয়লু। ‘অপরূপা’ এহানেই আমার বিঃ মঃ ঠারে পয়লাকার রঙ্গীন কভারর ম্যাগাজিন হান পারা পাউরী। কভার ডিজাইন হান অতি চুনা আছে। আমার কৃষ্টির ছবিহান তুলিয়া ধরে দিয়া আমারে ঙালকরে দিলাং।

সংখ্যাহানাং ফঙছে কবিতা, যারী, হাবি মোরার নুঙেই লাগেছে। বিশেষ করে ফাল্গুনী সিংহর ‘কর্মই ধর্ম’, ডঃ মণি সিংহর ‘শান্তি কুম্পেই’, বলদেব সিংহর ‘সাহিত্য বারো সাহিত্যিক’ জ্ঞানমূলক অনায়, সাহিত্যর সমাজ গঠনে সহায় করে উহান হারপেয়ার। ভ্রমণ কাহিনী, ‘ব্যাংককে বিধুর দিনে’, ‘জারর ব্যাখ্যা আছেতা’ আমারে তানুর দেশর কথা হারপোয়াছি।

হাবিরে হাদিয়ৌপা ধন্যবাদ দেউরী। ইতি -

১ লা বৈশাখ, ১৪১১

শ্রীমতি মানসী।

‘অপরূপা’ তোরে হারৌ করে পারেছে, হনিয়া নুঙেই পেইলু। ‘অপরূপা’ ২য় সংকলন হান নিকুলিল। ঔহানেউ তোরে হারৌ করে পারতৈ বুলিয়া মোর আশা। হয়ত এহানেই বিঃ মঃ ঠারর পয়লাকার রঙ্গীন কভারলো শাতছে ম্যাগাজিন। ধন্যবাদ।

২৮ শে আষাঢ়, ১৪১২ সন

আপনার বিশ্বস্ত
মানসী, গৌহাটী

সম্পাদক
অপরূপা

মাননীয় সম্পাদক গিরক।

‘অপরূপা’য় মোর মনহান ছরিয়া চর করিয়া নিলগা। ‘অপরূপা’র মলাটর ‘গোপী’ এগ নাঙহানর সাদানে অপরূপা আছে। ডিজাইনার ‘নেট এডুকেশন ব্রাদার হুড’রৈ অন্তর ফুকয়া থাকাত জানাউরী। গিরকর কামে আমারে আরাকৌ চালকরক। ঈশ্বররাঙ মাণ্ডরী গিরকরে আরাকৌ পাংকাল বড়াদিয়া আমার সাহিত্য, কলা, সংস্কৃতি বারো ঠারহানের ঙালকরক, পালকরক। ইতি -

১৭ ই ফাল্গুন, ১৪১১ সন

আপনার বিশ্বস্ত
মণিহার সিংহ, নরসিংহপুর

শ্রীযুক্ত মণিহার সিংহ

‘অপরূপা’ আপনারাং হবা লাগেছে উহানরকা ধন্যবাদ। এ সংকলনে ‘সমাজর তাবৎ সাহিত্যিকর রচনাবলী’ প্রকাশ করে দিয়া নুইলু। দুঃখিত। দ্বিতীয় সংকলনে ডাঙরীয়া কবি, সাহিত্যিক দুগো, আগোর রচনা প্রকাশ ঐল।

সম্পাদক

২৮ শে আষাঢ়, ১৪১১ সন

অপরূপা

সম্পাদক ডাঙরীয়া,

‘অপরূপা’ উদ্বোধনী সংখ্যাহান পেইয়া মোহিত অয়লু। বিশেষ করে আমার কৃষ্টি ঙালকরিয়া মলাটে গোপীর পরিকল্পনা জবর ঠিক পেইলু। মলাটর ডিজাইনার ‘নেট এডুকেশন ব্রাদরহুড’রে হৃদয়ৌপা থাকাং জানাইউরী।

পত্রিকাহানাং নিকুলেছে যারী, কবিতা, হাবিয়ৌ হোভা আছে। তবে ভ্রমণ কাহিনীর লগে আমার সামাজিক, অর্থনৈতিক, জীবনধার উন্নতির বারাদে জ্ঞানীগুণী লেখকর লেংকরা খানি শাং করে দিলে পত্রিকাহান আমার সমাজরে ইথৌ দেনাং আরাকৌ পাংকল্‌পা ভূমিকা নিতয়গা। আপানর গঠনমূলক দৃষ্টি ভঙ্গিরকা আপনারে থাকাং দেউরী।

মণিরাজ সিংহ

৫ ই আষাঢ়, ১৪১১ সন

গৌহাটী

শ্রীযুক্ত মণিরাজ সিংহ !

‘অপরূপা’র কভার ডিজাইনে আপনারে আনন্দ দিয়া পারেছে এহানরকা অশেষ ধন্যবাদ। আপনার মূল্যবান পরামর্শ মোর নিংশিঙে থাইতৈ। পিছেকার সংকলন হানিং মোর প্রচেষ্টা থাইতৈ। সমাজর জ্ঞানী গুণী গিরক গাছিরাং মোর সনির্বদ্ধ হেইচা-সামাজিক, অর্থনৈতিক, শিক্ষার গজে গঠনমূলক লেংকরা দিয়া পেঠা দিবাঙ।

সম্পাদক

২৮ শে আষাঢ়, ১৪১১ সন

অপরূপা

সম্পাদক গিরক !

অপরূপাই অপরূপ রূপ লইয়া ছাতইলহান দেহিয়া হারৌ অইলু। আরাকৌ হারৌ অইলু, অপরূপা সাহিত্য সংকলনহান মাহাহান লেহে ছাতইতই বুলিয়া।

য়ারি, প্রবন্ধ, কবিতা যেতা অপরূপাত লেংকরেছি উতা অতি মনোরম আছে।

অপরূপা পুষ্টি পালক।

শ্রীমতি মুখজ্যোতি সিংহ

১২/০৭/২০০৫ ইং

তরুণ নগর, গৌহাটী


শ্রদ্ধেয়া সুখজ্যোতি গিথানক !

অপরূপায় আপনারে আনন্দ দিয়া পারেছে হারপেয়া নুঙেই ঐলু। আপনার আশীর্বাদ অপরূপারে আরাকৌ মনোরম করতৈ।

২৮ শে আষাঢ়, ১৪১১ সন

সম্পাদক

অপরূপা



অপৰূপাৰ নিয়মাবলী

১. “অপৰূপা” সাহিত্য সংকলনহানৰ দাম প্রতি সংখ্যা রূপা ২৫ হান।
২. সংকলনহান ডাকযোগে দিয়া পেঠানি ঐতে।
৩. সংকলনহানৰ দাম (তিন মাহা / ছয় মাহা / বছৰ আহান) অগ্রীম দেনা লাগতে।
৪. সংকলনহানৰ দাম Cheque / Draft/ M.O./ Cash দেনা পারতাঙাই।
৫. গ্রাহকৰ নাঙ, ঠিকানা গাঙৰ নাং / শহরৰ নাং / পথৰ নাং / ঘরৰ নম্বর / পোষ্ট অফিস / পিন নম্বর / টেলিফোন থাইলে টেলিফোন নম্বর দিলে সংকলনহান দিয়া পেঠানিত সুবিধা ঐতে।


১. বিজ্ঞাপনৰ বিষয়বস্তু Logo / Design / Literature পরিষ্কার করে ইকরিয়া বা ছাপেইয়া দিলে হবা।

২. বিজ্ঞাপনৰ মাণ্ডল অগ্রিম দেনা লাগতে।

বিজ্ঞাপনৰ মাণ্ডল	ভাগ	রূপা
২নং	Cover Page	৮০০ হান
৩নং	"	৮০০ হান
৪নং	"	৬০০ হান
হাদির যে কোন পৃষ্ঠা আহান	চারভাগের তিন ভাগ	৫০০ হান
হাদির যে কোন পৃষ্ঠা আহান	পৃষ্ঠার দুই ভাগের এক ভাগ	২৫০ হান
হাদির যে কোন পৃষ্ঠা আহান	পৃষ্ঠার চার ভাগের এক ভাগ	১০০ হান

‘অপৰূপা’ত লেখা দিয়া পেঠানিৰ নিয়মাবলী

১. লিখা পরিষ্কার ডাঙৰ আখরে, আক পৃষ্ঠাত ইকরানি লাগতে।
২. অমনোনীত লেখা ফিরং পানারকা উপযুক্ত ডাক মাণ্ডল দিয়া নাং ঠিকানা ইকরা খাম আগ দেনা লাগতে।
৩. মনোনীত লেখা সংকলনহানাত ছাপলে ঐ লিখা ফিরং দেনা নাইতে।


পরিচালক

সর্বপ্রকার সম্পর্করকা
M.K. Sinha, IFS (Retd.)
Rajgarh Road, West bye lane - 12
Kundil Nagar, House No. - 47
Guwahati - 781 007
Tel - 2514041



PHALEI



Orion Tower, G.S. Road, Christian Basti, Guwahati - 781 005
Shop No. 19, Mezzanine Floor
Telephone : 2340204

Centre of Handloom, Handicraft & Garments
Outlet of North-East Women's Welfare Society - Assam
&

The only Library of the Bishnupriya Manipuri Language Books, Periodicals, Journals,
Magazine and News Papers.

ফলেই

শাখা দোকান

রাজগড় রোড, ওবেষ্ট বাইলেন - ১২, (কুঙিল নগর পথ) ঘর নং - ৪৭,
গুৱাহাটী - ৭, ফোন - ২৫১৪০৪১

উত্তর-পূব ভাৰতে বিষ্ণুপ্ৰিয়া মণিপুৰী হস্ততাত-বস্ত্ৰশিল্পৰ একমাত্ৰ দোকান
আসাম, বাংলা, মণিপুৰ, নাগালেণ্ড, মিজোৰাম, অৰুণাচল, উড়িষ্যা, উত্তৰ প্ৰদেশ, হৰিয়ানা, কাশ্মীৰ, হেণ্ডলুম বাৰো
হেণ্ডিক্ৰেফটৰ নিৰ্ভৰযোগ্য দোকান।
১৯৯৬ইংৰেজীত্ব জাতীয় সেৱাত ব্ৰতী আছে।

North-East Women's Welfare Society - Assam

বাৰো

বিষ্ণুপ্ৰিয়া মণিপুৰী ঠাৱৰ লেৱিক-লেইছৌ, পত্ৰ-পত্ৰিকাৰ একমাত্ৰ গ্ৰন্থাগাৰ।

বিষ্ণুপ্ৰিয়া মণিপুৰী সাহিত্য সভা পত্ৰিকা ফলেইত পেইতাঙাই।

সম্ভাষা - প্ৰকাশক - বেছেকুৱা - সেৱাৰী।

পৰিচালক
ফলেই

Culture Handloom, Habit Handloom
Support poor women weavers of the North-East
&
Culture Writings, Habit Reading
Support Mother Tongue, Serve the people

Management
Phalei